

屈

騷

指

掌

王序

吾友晉陵胡文英質餘氏博雅善著書尤嗜屈
騷既斷取漁父以上爲正文復益以二招其餘
則置不錄嘗慨王氏逸洪氏興祖諸注紕扃甚
多卽晦翁朱子攬撫雖勤往往于攷據訓詁猶
疎遂手自鈔撮爲之解誼食貧居賤東西游走
輒攜行篋中採剝修改至三四過稿始具余讀
其書于地理名物攷索最精不爲空言疏釋而
騷人之旨趣自出其有刊落舊說別豎新義者

蓋必稽之往籍按之目驗而後著之未嘗苟取
前師譌辭脞說以相詆訐從來屈注當以此爲
第一家質餘洵所謂好學深思多聞博物之君
子矣按太史公及劉向論次屈子于離騷外別
叙餘篇不以全書通目爲騷也班氏則以屈子
所自著者曰賦王氏采衆家之依放者盡附之
故題曰楚辭至蕭統始以諸篇皆謂之騷劉勰
辨騷亦然此書題署大氏從蕭劉氏云余獨疑
質餘曩嘗刊莊子矣茲又將刻屈騷行世夫此

二書者皆余之所篤好質餘爲人甚修飭絕不
類莊周放曠而屈大夫者放逐煩懣詞多鬱伊
若質餘則行高而心寬伏處白適彈琴咏歌其
閒居則嘿嘿然行于道塗則循循然夫何離憂
之有哉余不知其相感于百世之上者何義也
旣爲題其端又舉以訊之

乾隆二十六年辛巳夏五月西莊居士王鳴盛

題于京師青棠館

自序

余注屈騷最久辛巳夏晤王禮堂先生于都門
先生擊節歎賞爲余序其端茲流光荏苒又二
十五年矣恐久而散軼爰校而梓之亦不忘嗜
芟嗜痂之癖云爾

乾隆五十一年丙午春三月下浣武進胡文英

繩崖氏識

屈騷指掌

凡例

一屈賦二十五篇。班氏承史公之舊。蓋湘君湘夫人作一篇。大司命少司命作一篇。皆合廟分獻也。自王逸不知九歌之爲九。遂釐出二招。又列入諸家之作。今觀諸作。謂抒其感憤則得矣。至和平懇惻。有關於性情政治之得失。終莫能與屈賦並也。今仍班氏原文。槩刪諸家收入二招。故第名之曰屈騷。

一屈騷年次已遠，無可考次其先後。第于隱躍有據者，分注其時地于各篇之下。讀者心穎神探而得之，則可。至近時坊本，多以意顛倒舊章，非王逸原書次第，未免爲有識所笑。今摒出九辨諸作之外，槩依王逸本先後次序，蓋亦慎而闕疑之意也。

一屈賦中多有錯簡。緣古者竹帛分裂，師承各異，遂失正定。余于此書讀時甚多，解時甚少。記誦更絕不繫心，是以與古詩樂府互爲流

環沈鬱俯仰吟嘯迄今二十餘年初則不放過實字後并不肯放過虛字是以敢與舊說稍立異同然第注之曰此句宜在某句上下疑在應在某句上下不敢妄發議論誠不願讀者肆爲凌躐得注者之意忘作者之神也一屈賦列題于左古也第古人帛卷由左先展故識之曰右某篇欲使學者見題辨物或所求非此篇則仍卷之非有他意也今旣用逐篇紙卷則先展由右題亦宜在右矣故悉從

屈騷字句
文選之例標題在右其實與在左一也

一屈騷字句各本不同要當以語句渾厚上下
文虛神和洽者爲主至字之今古酌之洪興
祖朱晦菴諸本詳審上下文別無深義而怪
者恐係揚雄劉向增入則從恒用之字稍有
可疑及與周秦經史子集互相根據者仍用
古字

一屈騷之注一壞于穿鑿再壞于詭隨總于學
問思辨四字有義襲躐等諸弊蓋穿鑿緣心

躁詭隨緣心浮。古人博學不遺于俗諺。審問
不棄于芻蕘。慎思不入于元渺。明辨不執夫
固我。虛公之至。則我不生薑于樹。人不腫背
于駝。

一屈騷之注。自王逸至今。百有餘家。余注屈時。
不看諸解。惟求其理之是。神之順。情之曲。摯
無所不到。而銖黍不失乎正。其有不得者。沈
日夜設身處地求之。求之不得。而後檢諸解
之是非。其有是者。無論前賢時彥。必表其名。

不肯竊美

一屈賦篇幅宏闊賦比興雜出難與毛詩同論
界限朱子雖舊有賦比興之例然精神莫能
詳到往往爲物論借端今槩去之誠以學者
能以一氣順行乎千迴百折之中則賦比興
當自得之若到處凝滯反失其真矣

一屈騷解者旣多各偏所得勢不能無所是非
然君子之于書也第求其理之是而不求其
說之伸昔見注家取已所長擊人所短甚至

苦相排擠，俾其人無立錫之地而後已。雖明道不可不力，然亦不必過爲已甚。蓋理之然否，天下後世自有公論，豈可以強爭而勝者哉？故此書雖成，海內高明之士，倘能摘其非而進以確解者，不妨見示，俟纂入餘論，必不敢堅執前說以自成鄙固也。

一屈騷所用禽魚草木，僅毛詩十分之一。惟天問二招，多山經海志怪異之物，不可悉究。餘者正宜真知確見，以無負多識之訓，卽不知

者亦當闕疑以俟天下後世廣搜博識以得其真則傳疑猶傳信也古人博物如揚子雲鄭康成郭景純張揖陸璣極爲留心尚多謬誤余于書中鳥獸草木必聞見確切曲釋其形並攷南北土名俾博物君子知其是而然之知其非而辨之其有舊說游移淆混者必闕疑而不敢仍襲誠以千百萬人之心思共攻此一物則不憂不得其真若徒勦說雷同豈學者實踐之功哉

一屈子所涉之地，不無陵谷變遷，然其有功于民物，靈爽光昭，大槩不泯。故其所過所止之地，輒有古蹟俎豆之存。惟王逸以下，誤以今之湖南爲江南，是以湖南湖北江南之地名，確有可據者，反置之不論。其逆流順流，東西南北，水陸路徑，俱不分明。則屈子之志，亦因之以晦。余兩涉楚南，三留楚北，詢之耆宿，按之衆圖，繹之屈子之書，髣髴之所涉，得什一于千萬，以俟博物好游君子，攷而證之，其涉

境之然否當益著也

一屈騷之音楚音也然楚地甚廣上至今之湖南
北下至今之上下江江西大抵楚辭之音
楚南北音十居其七上下江音十居其三秦
燕豫粵之音亦多有之第學者多泥沈約韻
書沈吳音往往與楚音不同然欲強屈子從
沈約則過矣予嘗求土音于楚中學者多不
能得惟于童稚舟輿之際恒有領會故于楚
辭之音約分三等其同聲相諧者不論唇舌

齒喉平上去聲概從古韻相通蓋後世古詩
猶然況屈騷乎至不同聲者乃取土音讀之
無可讀者闕之皆以自然爲貴不欲強古人
以不適也

屈原列傳

漢司馬遷

屈原者，名平，楚之同姓也。爲楚懷王左徒，博聞強志，明于治亂，嫻于辭令，入則與王圖議國事，以出號令，出則接遇賓客，應對諸侯，王甚任之。上官大夫與之同列，爭寵而心害其能，懷王使屈原造爲憲令，屈平屬草藁未定，上官大夫見而欲奪之，屈平不與，因譏之曰：「王使屈平爲令，衆莫不知，每一令出，平伐其功，曰：『以爲非我莫能爲也。』」王怒而疏屈平。屈平嫉王聽之不聰也，

讒詔之蔽明也。邪曲之害公也。方正之不容也。故憂愁幽思而作離騷。離騷者。猶離憂也。夫天者人之始也。父母者人之本也。人窮則反本。故勞苦倦極。未嘗不呼天也。疾痛慘怛。未嘗不呼父母也。屈平正道直行。竭忠盡智。以事其君。讒人間之。可謂窮矣。信而見疑。忠而被謗。能無怨乎。屈平之作離騷。蓋自怨生也。國風好色而不淫。小雅怨誹而不亂。若離騷者。可謂兼之矣。上稱帝嚳。下道齊桓。中述湯武。以刺世事。明道德。

之廣崇、治亂之條貫、靡不畢見、其文約、其辭微、其志潔、其行廉、其稱文小而其指極大、舉類迥而見義遠、其志潔、故其稱物芳、其行廉、故死而不容自疏、濯淖污泥之中、蟬蛻於濁穢、以浮游塵埃之外、不獲世之滋垢、皜然泥而不滓者也、推此志也、雖與日月爭光可也、屈平既紉、其後秦欲伐齊、齊與楚從親、惠王患之、乃令張儀佯去秦、厚幣委贄事楚、曰、秦甚憎齊、齊與楚從親、楚誠能絕齊、秦願獻商於之地六百里、楚懷王

貪而信張儀遂絕齊使使如秦受地張儀詐之
曰儀與王約六里不聞六百里楚使怒去歸告
懷王懷王怒大興師伐秦秦發兵擊之大破楚
師于丹淅斬首八萬虜楚將屈匄遂取楚之漢
中地懷王乃悉發國中兵以深入擊秦戰于藍
田魏聞之襲楚至鄧楚兵懼自秦歸而齊竟怒
不救楚楚大困明年秦割漢中地與楚以和楚
王曰不願得地願得張儀而甘心焉張儀聞乃
曰以一儀而當漢中地臣願請往如楚如楚又

因厚幣用事者臣靳尚而設詭辨于懷王之寵
姬鄭袖懷王竟聽鄭袖復釋去張儀是時屈平
既疏不復在位使于齊顧反諫懷王曰何不殺
張儀懷王悔追張儀不及其後諸侯共擊楚大
破之殺其將唐昧時秦昭王與楚婚欲與懷王
會懷王欲行屈平曰秦虎狼之國不可信不如
無行懷王稚子子蘭勸王行奈何絕秦歡懷王
卒行入武關秦伏兵絕其後因留懷王以求割
地懷王怒不聽亡走趙趙不內復之秦竟死于

秦而歸葬。長子頃襄王立。以其弟子蘭爲令尹。楚人旣咎子蘭。以勸懷王入秦而不反也。屈平旣嫉之。雖放流。睠顧楚國。繫心懷王。不忘欲返。冀幸君之一悟。俗之一改也。其存君興國而欲反覆之一篇之中。三致意焉。然終無可奈何。故不可以反。卒以此見懷王之終不悟也。人君無愚智賢不肖。莫不欲求忠以自爲。舉賢以自佐。然亡國破家相隨屬。而聖君治國累世而不見者。其所謂忠者不忠。而所謂賢者不賢也。懷王

以不知忠臣之分，故內惑于鄭袖，外欺于張儀，疏屈平而信上官大夫、令尹子蘭，兵剄地削亡其六郡，身客死于秦，爲天下笑。此不知人之禍也。易曰：『井渫不食，爲我心恻。』可以汲，王明並受其福。王之不明，豈足福哉？令尹子蘭聞之，大怒，卒使上官大夫短屈原于頃襄王。頃襄王怒而遷之。屈原至于江濱，被髮行吟澤畔，顏色憔悴，形容枯槁。漁父見而問之曰：『子非三閭大夫歟？何故而至此？』屈原曰：『舉世混濁而我獨清，衆人

皆醉而我獨醒，是以見放。漁父曰：夫聖人者，不
凝滯于物，而能與世推移。舉世皆濁，何不隨其
流而揚其波？衆人皆醉，何不餽其糟而啜其醢？
何故懷瑾握瑜，而自令見放爲？屈原曰：吾聞之，
新沐者必彈冠，新浴者必振衣。人又誰能以身
之察察，而受物之汶汶者乎？寧赴常流而葬于
江魚腹中耳。又安能以皓皓之白，而蒙世之溫
蠱乎？乃作懷沙之賦。于是懷石，遂自投汨羅以
死。屈原旣死之後，楚有宋玉、唐勒、景差之徒者，

皆好辭而以賦見稱。然皆祖屈原之從容辭令，終莫敢直諫。其後楚日以削，數十年竟爲秦所滅。自屈原沉汨羅後，百有餘年，漢有賈生爲長沙王太傅，過湘水，投書以弔屈原。

太史公曰：余讀離騷、天問、招魂、哀郢，悲其志，適長沙，觀屈原所自沉淵，未嘗不流涕，想見其爲人。及見賈生弔之，又怪屈原以彼其材，游諸侯，何國不容，而自令若是。讀服鳥賦，同死生，輕去就，又爽然自失矣。

屈原外傳

唐沈亞之

昔漢武愛騷，令淮南作傳，大概屈原已盡于此。故太史公因之以入史記，外有二三逸事見之。雜紀方志者尤詳。屈原瘦細美髯，丰神朗秀，長九尺，好奇服冠切雲之冠，性潔，一日三濯纓，事懷襄間，蒙讒負譏，遂放而耕，吟離騷，倚耒號泣于天。時楚大荒，原墮淚處獨產白米如玉。江陵志有玉米田，卽其地也。嘗遊沅湘，俗好祀，必作樂歌以樂神，辭甚俚，原因棲玉筍山，作九歌，托

以風諫至山鬼篇成四山忽啾啾若啼嘯聲聞
十里外草木莫不萎死又見楚先王廟及公卿
祠堂圖畫天地山川神靈琦瑋儵倏與古聖賢
怪物行事因書其壁呵而問之時天慘地愁白
晝如夜者三日晚益憤懣披蓁茹草混同鳥獸
不交世務採栢實和桂膏歌遠遊之章托遊仙
以自適王逼逐之于五月五日遂赴清泠之水
其神遊于天河精靈時降湘浦楚人思慕謂爲
水仙每值原死日必以筒貯米投水祭之至漢

建武中，長沙區回，白日忽見一人，自稱三閭大夫，謂曰：「聞君嘗見祭，甚善，但所遺並蛟龍所竊。今有惠，可以楝樹葉塞上，以五色絲轉縛之。此物蛟龍所憚，回依其言，世俗作糉，并帶絲葉，皆其遺風。」晉咸安中，有吳人顏珏者，泊汨羅，夜深月明，聞有人行吟曰：「曾不知夏之爲丘兮，孰兩東門之可蕪。」珏異之，前曰：「汝三閭大夫耶？」忽不見其所之。江陵志又載原故宅，在秭歸鄉。北有女嬃廟，至今擣衣石尚存。時當秋風夜雨之際，

砧聲隱隱可聽也。嘻異哉。原以忠死。直古龍比
者流。何以沒後多不經事。特千古騷魂。鬱而未
散。故鬻熊雖久不祀。三閭之跡。猶時彷彿占斷
于江潭澤畔。蒹葭白露中耳。

屈騷指掌目次

卷之一

離騷

卷之二

九歌

湘君湘夫人合一歌大司命少司命合一歌

東皇太一

雲中君

湘君 湘夫人

大司命 少司命



東君

河伯

山鬼

國殤

禮魂

天問

卷之三

九章

惜誦

涉江

哀郢

抽思

懷沙

思美人

惜往日

橘頌

悲回風

卷之四

遠遊

卜居

漁父

招魂

大招

屈騷指掌 卷一

武進胡文英繩崖注

離騷

離騷先述祖父中及其姊末曰國無人玩其嚴整應是初被疏放時同秭歸故居所作秭歸即今宜昌府歸州

帝高陽之苗裔兮朕皇考曰伯庸

左傳僖二十六年夔子不

祀祝融秋楚子滅夔蓋夔與楚皆祝融之後實顓頊高陽氏之後也楚武王子屈原受屈地爲卿子孫因得屈姓原即其後故與楚爲宗卿也皇考父也曲禮父曰皇考伯庸五臣注云原父名洪氏以爲原父字不知古有顯親揚名而無顯親揚字也且禮臨文不諱攝提貞于孟陬兮惟庚寅吾以降
庸降古通韻。爾雅釋歲歲在寅曰攝提

格貞正也。又爾雅釋月：正月為陬，以夏正攷之，蓋寅月也。庚寅，日也。原之生年月日皆在寅也。

降如維嶽。皇覽揆余于初度兮，肇錫余以嘉名。

降神之降。覽揆，相度也。初度，初名。余曰正則兮，字余曰靈。

均。正平則法也。靈均，天所付之秀靈，均平無頗也。紛吾既有此內美兮。

又重之以修能。內美，本質也。修能，學力也。能字與均字本屬一韻，他解叶入佩。

韻牽強不可從。下凡本有。扈江離與辟芷兮，紉

秋蘭以為佩。汨余若將不及兮，恐年歲之不吾

與。扈音汚，去聲。辟與僻同。汨音骨。扈，近身而收其芳澤也。江離，江南俗名離香草，芷一名

澤蘭，根白如雪，葉如鳳仙花，對節而生，大者三岐，頂上開小紫花如米，通體皆香。郢中產，紉如

紉箴請補之。紉秋蘭產蜀中。朝搴阰之木蘭兮。

夕攬洲之宿莽。日月忽其不淹兮。春與秋其代

序。阰音皮。搴牽引而取之也。阰與陂同。洪氏承王氏之謬。以阰爲山名。在楚南。阰旣可爲

山名。則洲亦可以爲地名矣。木蘭一名樹蘭。小者數尺。高者數丈。皮細于木犀。葉亦相似。花小

而香。閩粵人以之和烟草。名蘭花烟。史記優孟曰。齋以薑棗薦以木蘭。是也。宿莽未詳。原言已

之。如此朝夕孜孜。日月已不淹。留所以起下。恐美人之遲暮也。惟草木之零落

兮。恐美人之遲暮。美人謂君也。古詩陽春布德澤。萬物生光輝。常恐秋節至。

焜黃華葉衰。蓋精華一謝。努力亦無不撫壯而

及矣。臣子愛君以德。不當若是乎。棄穢兮。何不改乎此度。改乎此度。必指一事而言。孟子王庶幾改諸子

日望之同。乘騏驥以馳騁兮。來吾導夫先路。馳

此用意。同夫音扶下同。騏驥喻法度之可行者來吾

道夫先路恐君畏難晏安故已願先行以顯其

也。昔三后之純粹兮。固衆芳之所在。三后見

伯夷禹。雜申椒與菌桂兮。豈惟紉乎蕙茝。菌音

稷也。音改又音藹。申椒申地所產之椒。菌桂即今

之肉桂。葉如柿而狹長。枝幹稠直。皮色如西北

方之白楊。李時珍以爲木犀非也。黃山谷曰。蕙

一莖數花。蘭一莖一花。茝香草。方赤莖。葉如馬

蘭頭草。紫苞開小白花。通體俱香。荊豫名解。汗

草鄂黃名醒頭香。吳名醒頭草。北方曰茝。康草

彼堯舜之耿介兮。既遵道而得路。耿介明而有

道故得路。三后不愧爲臣。堯舜何桀紂之昌被

不愧爲君。所謂責難于君也。

今夫惟捷徑以窘步。

昌與猖同被音披。猖被放縱無檢束如不介馬而

馳之類也。捷徑窘步喻以私智行小道故至于顛覆也。

唯黨人之偷樂兮。

路幽昧以險隘。

樂音洛隘音益。黨人上官之屬。蓋上官欲譏原必先與左右

近臣互相糾結及進譏之時懷王亦必詢其真僞而小人共文致其罪故曰黨人若漢唐宋明以小人而目君子為黨夫亦變白為黑愈出愈工而君子幾無自全之術矣吁可畏哉偷樂陰縱已欲也幽昧險隘則無可共由而將為窘步之續矣柰何以此道君哉豈余身之

憚殃兮恐皇輿之敗績。

至于窘步時豈僅我一身畏禍哉實恐君之顛

覆而不忍坐觀也。

忽奔走以先後兮及前王之踵武。

詩毛

予曰有奔走予曰有先後前王踵武堯舜所行也。

荃不揆余之中情兮。

反信讒而齋怒。

荃音殄。齋音贅。荃芳草與萱草相似。此以芳草喻君也。齋疾。

也。余固知謇謇之爲患兮，忍而不能舍。

謇謇訥言而諍。

也。數而取辱之義。臣豈不知然欲忍而又不能舍。蓋亦行其心之所安而已。此二句疑應在

夫唯靈脩之故。句下指九天以爲正兮。夫唯靈

初既與余成言。句上

脩之故。靈修得其秀靈而又有

曰黃昏以爲期

兮。羌中道而改路。

此二句衍文。洪興祖曰。此二句王逸無注。至下文羌內恕

已以量人。今始發羌字之義。疑後人所增也。余按黃昏爲期。抽思篇有此二句。或係重出也。

初既與余成言兮，後悔遁而有他。余既不難夫

離別兮，傷靈脩之數化。

成言成約也。承上言我之明知謇謇爲患而不

舍者恃與君有成約耳孰知君悔遁而有他志
哉離別指疏放言數化謂始于未得道而化至
成言之局今又從黨人而化爲悔遁也余旣滋蘭之九畹兮又樹

蕙之百畹畦留夷與揭車兮雜杜衡與芳芷

音晚

宛。三十畝曰畹畹畝同畦畫其町畦也留夷
揭車未詳其形爾雅揭車芎輿余按楚省有揭
香而未有揭車俟更攷也杜衡花名按西山經
天帝之山有草焉其狀如葵其臭如薜蘿名曰
杜衡可以走馬食之已癭舊說誤以杜衡爲馬
蹄香馬蹄香卽零陵香葉大如指與其狀如葵
之說冀枝葉之峻茂兮願埃時乎吾將刈

此喻已平

日培植人材之多將以爲國家之用也夫爲政
之要莫急于人材伊周之佐君不過如是而屈
子已見及之豈若世之高言經濟而于人材漠
不經心至于孔亟之時倉皇自斃而無一人之

足恃者哉。雖萎絕其亦何傷兮。哀衆芳之蕪穢。萎絕何傷

餓死事小也。衆芳蕪穢。失節事大也。黨人競進。成風以相導。則九畹百畹之多。保無有委厥美

而爲小人所用者乎。然其初則嚮善而來。中爲小人所誘。是可哀也。衆皆競進以

貪婪兮。憑不厭乎求索。索。桑故切。婪。貪之盡也。靳尚楚臣而敢受敵

國之賄。則其于本國貪婪可知矣。憑。依據也。羌。恐人奪其位。故方求索之時。復興心嫉妬也。羌

內恕已以量人兮。各興心而嫉妬。羌。孰料也。恕。已量人。謂自

我平心而付也。各興心而嫉妬。君子嫉邪。小人害正。以我之憎小人量之。則小人之憎我亦其

宜也。忽馳驚以追逐兮。非余心之所急。承上言小人競進我

亦有所追逐。但我之所急。非若小人之貪利分道而馳。不必妒我也。老冉冉其將

至兮。恐脩名之不立。

君子疾沒世之無稱蓋必須實有功于民物方能不

朽故世之未嘗聞道而托于隱遁者之所以為純盜虛聲也。不然聖賢豈不知自逸而顧為此

汲汲朝飲木蘭之墜露兮夕餐秋菊之落英。英古

音央。墜露落英言學力自然不假勉強也。

苟余情其信娉以練要

兮。長顧領亦何傷。

顧領音罕汗。信娉練要無實得之功脩而簡練揣摩也。

顧領或揚視或領之所謂含怒待臣也舊注食不飽而面黃之貌君子謀道不謀食義未確也

擘木根以結茝兮貫薜荔之落葉。

擘攬同薜荔音必利。木

根木蘭之根也薜荔藤生葉圓長開小黃花好緣壁而生楚地俱產矯菌桂以紉

蕙兮索胡繩之纒纒。

纒音里。胡繩未詳其形疑即今郢中所產之元胡

索也。纒纒不絕貌。韓非子洋洋纒纒然。或得其根本以旁徹。或貫其曼衍之餘英。或屈烈性以就馨香。或膺藥石以爲永鑒。皆實踐之學。非簡練揣摩者比也。謬吾法夫前脩。今非世俗之所服。雖不周于今之人。今願依彭

咸之遺則。

前脩古賢也。服習慣也。周合也。彭咸殷大夫。諫君不用。投水死。言我之爲

此謬謬者。本以法夫古賢也。乃世俗已不相習而驚而怪之矣。然吾之志本不斷合于今之時俗。但能如彭咸之死。長太息以掩涕。今哀民生

得其所亦已幸矣。

長太息以掩涕。今哀民生

之多艱。

民生人生也。此二句脫簡。宜作余雖哀民生之多艱。今長太息以掩涕。余雖

好脩姱以鞿羈兮。謬朝諝而夕替。

鞿羈音機。計諝音雖。機

羈受人所掣曳也。諝叱咤之聲。吳楚有此諺。莊子虞人逐而諝之。言我雖好脩而甘受人所掣

曳然世俗之人朝則諱之夕既替余以蕙纒兮則替之不欲我有此脩姱也

又申之以攬茝亦余心之所善兮雖九死其猶

未悔纒音襄。纒佩悅之屬承上言彼雖廢我之蕙纒而我又加之攬茝者誠以姱脩乃

我之所善雖九死猶不以怨靈脩之浩蕩兮終為悔豈挫折之所能改乎

不察夫民心浩蕩寬大不覺察也民心人心也

衆女嫉余之蛾眉兮謠詠謂余以善淫詠音咏。蛾眉

喻已之才美出衆也謠流言也詠以言語詠害人

也言此皆妒我者謂有此耳非臣之實有是不善之行也君柰固時俗之工巧兮偃規矩而

改錯背繩墨以追曲兮競周容以為度偃音面。偃或

曰向也。或曰背也。蓋由面轉背之意。猶詩輶字之義耳。當規矩繩墨陳設之地。雖欲改之。則人必不以爲然。故工巧者。必偁之背之也。周容爲度。以合而取容爲度。不問其離規矩繩墨若何也。

也。屯鬱邑余佗僚兮。吾獨窮困乎此時。

屯音屯邑音同

佗僚音叔菜。

此二句脫簡。宜作吾獨窮困乎此時。今屯鬱邑余佗僚。屯有物屯於心而不得

去也。佗僚去住兩難之貌。

寧溘死以流亡兮。余不忍爲此態。

第曰不肯爲。不能爲。猶屬有強制。曰不忍爲。則三代直道。根心而然矣。

驚鳥之不

羣兮。自前世而固然。

驚鳥。騅也。卽鷹隼之類。毛詩傳。騅。夫不一宿之鳥。夫

不。夫不與婦同宿。一宿獨宿也。前世古來也。喻已之剛鷺。故不入羣也。

何方圓之

能周兮。夫孰異道而相安。

方圓能周。隨方逐圓。無所不合也。方圓能

周異小人之何以能無所不合也。異道不能相安。詫已之無術以處此也。屈心而抑志兮。忍尤而攘詢。伏清白以死直兮。固前聖之

所厚。

詢與詬同。承上言已既不能苟合。故屈心抑志而不得伸。忍時俗之尤而取世之

詬厲也。然尤詬何足為病。即使伏于清白而不汙死于直節而不枉。猶為取義成仁而為古聖

人之所深許者。尤詬何足為病哉。悔相道之不察兮。延佇乎吾

將反。

相道不察。始則誤以為可行其道也。延佇將反。知道之不行而思歸隱也。回朕

車以復路兮。及行迷之未遠。

陶靖節迷途未遠。即用此意。

步

余馬于蘭皋兮。馳椒邱且焉止息。

蘭皋椒邱。遊息之地。無時

不學也。

進不入以離尤兮。退將復脩吾初服。

離。離。同。

初服初年之所行也製芰荷以為衣兮。集芙蓉以為裳。集

同。唐人贈隱士詩多用荷衣事即此意也不吾知其亦已兮。苟余

情其信芳。不吾知而信芳亦昌黎吾之退未始不為進之意也高余冠之

岌岌兮。長余佩之陸離。芳與澤其雜糅兮。唯昭

質其猶未虧。糅音丑。陸離班駁貌。昭質本來

也。昭質未虧則有以復其初矣。蓋信芳而不染于污俗則昭質自然無虧也忽反顧

以游目兮。將往觀乎四荒。游目周視也。爾雅觚

謂之四荒。蓋以天付我以如是之材質。必將有用我之處故託辭以盡其意也佩繽紛

其繁飾兮。芳菲菲其彌章。彌章則雖欲隱而不能矣民生各

有所樂兮。余獨好脩以爲常。雖體解吾猶未變。

兮。豈余心之可懲。

樂音洛。好脩爲常。體解未

君子久之而或難于事端。或迫于公論。未嘗不欲稍用君子以平其勢。但不欲其倔彊猶昔。而欲其隨吾運轉耳。豈知大丈夫寧爲蘭摧玉碎。而不忍爲蕭艾之敷榮。此所以體解不變而心

不可懲也。

女嬃之嬋媛兮。申申其詈予。

嬋音須。嬋媛。原姊名。聞原

被放而歸。視之故歸州。以此得名。又名其鄉曰姊歸鄉。後賢立廟于鄉。祀之。離屈原故宅不遠。嬋媛。眷戀也。哀郢篇。心嬋媛而傷懷。申申。重復也。愛其弟。恐罹大禍。故詈之。使自改也。曰

鮀。直以亡身兮。終然殒乎羽之野。

蘇東坡曰。史記。殒。鮀。

羽山。以變東夷之俗。鮀。蓋剛而犯上者耳。若小人也。安能變東夷之俗。愚謂鮀。蓋才長而量不

足者觀祀典與舜勤衆事並舉屈子屢以汝何
自況亦可想見其爲人矣不盡天年曰歿汝何

博謇而好脩兮紛獨有此姱節博謇博學此謇
謇也紛多貌指

下菴施下菴施音施資菴施以盈室兮判獨離而不服資菴音
菴

音礫施音施許氏說文資衆草也愚按資聚
也菴王芻也楚名淡竹葉又名竹葉菜豫名菴

草秦名翠蛾兒吳名水淡竹施菴卷施也爾雅卷
施草拔心不死未詳其形獨離離南也爾雅離

南活菴倚商活脫一物也又名通脫木今婦人
取以爲通草花女嬰引之蓋欲其學通脫以自

全非欲其爲惡行也自王叔師強以資爲茨遂
令嬰蒙屈千載且使紛獨有三字義無歸宿也

通脫木楚中產衆不可戶說兮孰云察余之中情世並

舉而好朋兮夫何煢獨而不予聽說音稅。此
余字嬰代原

言也言汝不學通脫必為衆所惡矣豈可以家
至而戶說之耶即或有聽汝之言者亦不過外
貌耳豈能知汝中情之所存耶况世人好同惡
異汝何以甘于熒獨而不我聽哉此予字婁自
謂也。婁依前聖以節中兮喟憑心而歷茲中節

言止此。節取中道也憑滿也滿意得濟沅湘以南征兮

行其道而反歷此軾軻也

就重華而噉詞。重平聲噉古陳字。沅湘二水

州府至常德府入洞庭湖湘水發源貴州經沅州府辰

州府衡州府至長沙府入洞庭湖水本二而合

言之者猶禹貢岷嶓既藝之義也就重華陳詞

世既並舉好朋止可仍向前聖定其是非也

啟九辨與九歌兮夏康娛以自縱

虞書勸之以九歌俾勿壞

禹掌九土之辨并以是而傳之啟也啟之九辨

九歌本以教民而非以為娛也而夏康以此為

娛而自縱者何哉。新唐書：太常有五方師子樂，非大朝會不作。穆宗嗜聲色，宦官掌教坊者，移書取之，與此相類。夫祖宗之樂，本以示功德，而子孫乃以爲戲，其衰也不亦宜乎？不顧

難以圖後兮。五子用失乎家術。難去聲術音美。吳楚諺謂宮

中長巷曰術。太康已不顧難，乃至累及五弟。何哉？五子之歌：厥弟五人，御其母以從，俟于洛之

汭。羿淫遊以佚畋兮，又好射夫封狐。固亂流其

鮮終兮。浞又貪夫厥家。夫音扶。羿距太康于河，宜鑒十旬之畋矣。乃

復樂于遊畋，蓋亂臣賊子無善全之理，故浞又貪其家而殺之。螳螂捕蟬，不知更有捕已者矣。

澆身被服強圉兮，縱欲而不忍。日康娛而自忘

兮。厥首用夫顛隕。澆與杲同。被服，習練也。強圉，猶強禦也。顛隕，少康逐犬

而隕其首也。夏桀之常違兮。乃遂焉而逢殃。桀不遇湯未必

遂殃。遂焉而逢。理所必有疎而不漏也。后辛之菹醢兮。殷宗用之

不長。紂之菹醢賢人。自謂有命在天而無虞矣。孰知不徒喪身並墜其宗耶。湯禹

儼而祇敬兮。周論道而莫差。差音初舉賢才而授

能兮。循繩墨而不頗。頗偏也。皇天無私阿兮。覽民

德焉錯輔。錯措同。承上言天非惡于桀紂而好于禹湯文武有所私阿也。不過視

君之何如而栽培傾覆物以類致耳。夫維聖哲之茂行兮。苟得用

此下土。茂與懋同行去聲。承上言天之所以錯輔聖君者。豈有他哉。亦以聖君自懋

其德誠足以當此。瞻前而顧後兮。相觀民之計

極。夫孰非義而可用兮。孰非善而可服。相去聲。然天

猶不輕于付託也。必瞻其前之所爲。顧其後之
足以當此重任否。而又相觀民之所以計。君立
極者何如。所謂天視自我民視也。天之鄭重也
如此。古豈有用非義服非善者乎。蓋黨人幽昧
險隘。必有道君以非
義非善者故及之。 咄余身而危死兮。覽余初

其猶未悔。不量鑿而正柄兮。固前脩以菹醢。音咄

沿柄音芮。咄近邊欲墮之意。言小人以危法

中我。冀我之悔而從之耳。然反顧我之初服。又

何悔哉。況不量鑿之能受與否。而遽正柄以入

之。前脩已有罹決裂之害者矣。前脩尚然而况

乎。我曾歔歔余鬱邑兮。哀朕時之不當。攬茹蕙以

掩涕兮。霑余襟之浪浪。當浪俱平聲。曾重也。歔歔飲泣聲。浪浪垂涕

貌朕時不當我生之後也。茹蕙掩涕。余襟跪敷。浪浪本以媵脩自慰。反覩媵脩而垂涕也。

枉以陳辭兮。耿吾既得此中正。駟玉虬以乘鸞。

兮。溘埃風余上征。乘乘同鸞音衣。跪而陳辭。辭重華而行也。耿明也。明得

此中正之理。所謂不與其命何生其木而將駟。虬乘鸞更求賢者以通吾情也。龍無角曰虬。鸞

鳳類。埃風自然之風。莊子野馬也。塵埃也。生物之以息相吹也。朝發軔于蒼梧。

兮。夕余至乎縣圃。欲少留此靈瑣兮。日忽忽其

將暮。軔音忍。縣懸同。軔支車木也。行則發之。蒼梧舜葬處。淮南子縣圃在崑崙閭闔之

中。靈瑣閭闔之瑣闔也。日將暮。托言時之晚也。蓋是時強秦吞并之勢已成。若不早圖。噬臍無

及吾令羲和弭節兮。望崦嵫而勿迫。路曼曼其

脩遠兮。吾將上下而求索。崦嵫音奄。茲。義和日御。崦嵫日所入之

山言路長而求索未得。此日未可以迫我也。飲上下求索。思得賢臣以達吾之忱于君也。

余馬于咸池兮。總余轡乎扶桑。折若木以拂日

兮。聊逍遙以相羊。飲去聲。淮南子。天文訓。日出暘谷。浴于咸池。拂于扶桑。

又若木在建木西。山海經。若木之華。其光照前地。相羊。猶翱翔也。此皆申明欲其勿迫之意。

望舒使先驅兮。後飛廉使奔屬。屬去聲。望舒月御。飛廉風神。

前望舒所以啟其明。後飛廉所以致其遠。驚鳳爲余先戒兮。雷師告

余以未具。吾令鳳鳥飛騰兮。繼之以日夜。爲去聲。

驚鳳先戒。得其使矣。雷師性急。遂以未具相告。故又使鳳鳥日夜不息。庶可及時達吾忱也。

飄風屯其相離兮。帥雲霓而來御。紛總總其離

合兮。班陸離其上下。

御音迂。飄風驟然之風也。屯其相離則鳳鳥之使

難通。雲霓來御則望舒之明難啓。紛總二句皆

飄風雲霓交相爲蔽之象也。太白詩總爲浮雲

能蔽日。長安不見使人愁。卽此意也。吾令帝閭開關兮。倚閭闔而

望予。帝閭上帝闔者求索而爲風阻雲隔故欲

帝閭開關庶可直達吾忱而闔者徒倚闔

闔而望則時曖曖其將罷兮。結幽蘭而延佇。世

不得入矣溷濁而不分兮。好蔽美而嫉妬。曖音優好去聲

陶詩曖曖遠人村曖曖將罷時不我與也結蘭

延佇撫孤芳而無與爲賞也世溷濁則無一人

足與言好蔽美則朝吾將濟于白水兮登閬風

爲性生之不可改

而縹馬

闐音浪縹音洩。白水發源于崑崙爾雅。河出崑崙墟。色白。闐風闐苑地亦在

崑崙山也。

忽反顧以流涕兮。哀高丘之無女。

高丘

縹。縹也。

無女。喻君側之無賢人。蘇長公詞。

溘吾遊此春

瓊樓玉宇。高處不勝寒。亦此意也。

宮兮。折瓊枝以繼佩。

溘。忽然也。春宮。青帝之宮。發榮滋長之地。庶無憂于

遲暮也。瓊枝。

及榮華之未落兮。相下女之可詒。

瓊樹之枝也。

相去聲。此二句。疑應在處妃之所在。下。解佩

纓句上。榮華。瓊樹之華。下女。處妃之侍女。

吾令豐隆乘雲兮。求處妃之所在。

豐隆。雷神也。雷至疾。故能

升而不為浮雲所蔽。淮南子。天文訓。季春三月

豐隆乃出。以將其雨。處妃。伏羲氏女。相如賦。青

琴。處妃之徒。此以賢女喻賢臣也。

解佩纓以

此二句。疑應在及榮華之未落上。

結言兮。吾令蹇脩以爲理。蹇脩蹇蹇之嫫脩以意爲人亦上林烏有

桃源漁人之類也紛總總其離合兮。忽緯繯其

難遷。緯繯音韋畫。離合其見未定也夕歸次

于窮石兮。朝濯髮于洧盤。窮石洧盤皆地名。次窮石則如有窮氏之

恃其技故下云驕傲濯洧盤則如保厥美以驕

傲兮。曰康娛以淫遊。雖信美而無禮兮。來違棄

而改求。人有周公才美猶不可驕客况又加以康娛淫遊乎此所以惡其無禮而別求

賢淑以達覽相觀于四極兮。周流乎天余乃下。

望瑤臺之偃蹇兮。見有娥之佚女。相去聲。爾雅東至于秦

遠西至于邠國南至于濮鉛北至于祝栗謂之
四極偃蹇翹起貌有娥逸女高辛世妃皆不好
之人故欲求吾令鳩爲媒兮鳩告余以不好
以達吾忱也鳥也鳩鳥晏安故不肯行而雄鳩之鳴逝兮余
託辭不好也吾使之彼不往雄鳩之鳴逝兮余
猶惡其佻巧彼願往吾不使心猶豫而狐疑兮欲自適
而不可不使媒鳳凰旣受詒兮恐高辛之先我
旣使媒又不諧。于四者之中一無欲遠集而
所就所以曲盡其意而致其誠也無所止兮聊浮游以逍遙及少康之未家兮留
有虞之二姚至于四極則已止矣更欲遠集將
二姚中興夏室者處妃帝者之祥有娥王者之
祥二姚中興霸者之祥易妻道也臣道也故屢

以賢女喻賢臣。求達吾忱也。理弱而媒拙兮。恐導言之不固。

理弱媒拙。托言之也。導言不固。則雖欲小就近。功而不能矣。蓋霸術本非所願。故微及之。而不

甚切也。世溷濁而嫉賢兮。好蔽美而稱惡。惡去聲。稱惡。

稱我所見惡。于君之事也。閨中既以邃遠兮。哲王又不寤。懷

朕情而不發兮。余焉能忍而與此終古。邃音粹。焉音烟。

。閨中邃遠。不能見賢女以達吾之忱也。哲王。懷王也。寤。與悟同。即上文所云不察民心也。與

此終古。謂此時不能有所建立。將索薺茅以筵

。混混于宇宙之間。終古如此也。筵。索薺茅以筵。尊兮。命靈氛為余占之。薺音瓊。筵。筵同。尊音專。

茅似蘭而狹長三四尺。赤葉無中莖。郢中產爾。雅。薺。薺茅。即此物也。郭景純不知。但解薺字而

遺茅字誤矣寸折爲筵簞布策也周易策字從竹可以類推楚中或折草折竹折木枝折炷香信手布卦以占吉凶靈氛善占者檀默齋云黃茅折草以下俗云招茅卦是也筵簞擲玳瑁以下俗云討管子是也玳瑁或用木或判竹或以蜃蚌各隨風土用之故字或从玉从竹曰兩美其必合兮孰信脩而慕之兩美必合其理如是也孰信脩以楚之無賢思九州之博大兮豈惟是其有女隨地人也引進之人曰勉遠逝而無狐疑兮孰求美而釋不必楚也女汝同。無狐疑見原之爾何懷乎故宇言隨地皆有賢人足以容汝之嬌脩不必楚都也世幽昧以眩曜兮孰云察余之善惡民好惡其不同

兮。惟此黨人其獨異。戶服艾以盈要兮。謂幽蘭

其不可佩。惡去聲。要古腰字。善惡所善所惡也。舊作美惡言。不知屈子固有美無

惡也。屈子之所善者在芳馨之物。所惡者在穢惡之類。人之好惡雖不同。然大抵不遠。至于黨

人則純與屈子相反。故可怪也。戶比戶也。指黨人言。艾不芳之草。覽察草木其

猶未得兮。豈理美之能當。草木指賢否言。理美自喻也。蘇糞

壤。曰充幃兮。謂申椒其不芳。曰古以字。蘇散也。糞壤充幃則較

之服艾盈腰而愈甚矣。欲從靈氛之吉占兮。心猶豫而狐

疑。巫咸將夕降兮。懷椒糈而要之。要平聲。靈氛已令其無

狐疑。此復狐疑而決之于巫咸。皆多方托言以盡其意。非誠有是心也。巫咸古賢人。知吉凶者。

椒糝芳百神翳其備降兮九疑續其並迎皇剡

剡其揚靈兮告余以吉故剡音癖。百神備降則可以決其疑九疑

並迎則獻疑多而難決矣故必須巫咸揚靈以致辭也九疑山名皇指巫咸言。皇剡二句疑

脫簡應作告余以吉故今皇剡剡其揚靈曰勉陞降以上下兮求渠

獲之所同渠獲音矩獲。陞降跋涉也上下即上下求索之意渠獲所同則不至不

量鑿而正枘矣湯禹儼而求合兮摯咎繇而能調苟中

情其好修兮又何必用夫行媒咎繇與皋陶同摯伊尹名古

賢君虛心以求合于道則臣亦一德而合于君蓋苟有好修之君自不戒以孚而無用紛紛求

媒以達吾忱也說操築于傳巖兮武丁用而不疑呂望

之鼓刀兮。遭周文而得舉。寧戚之謳歌兮。齊桓

聞以該輔。

說音悅。說築傳巖見書說命呂望屠于朝歌戰國時有此說寧戚謳歌

見淮南子

及年歲之未央兮。時亦猶其未央。

年歲兼已及君

而言時未央謂大運未去及今猶可挽回造化也

恐鵽鵽之先鳴兮。使

夫百草爲之不芳。

鵽鵽音啼尖。鵽鵽子規也恒以三四月啼其聲悲感聽

之使人百事皆墮精神懈怠此鳥一啼春芳盡歇喻小人功利之說既行則士氣不振也是時

張儀猶未至楚屈子已逆畏其有是說矣何瓊國之存亡爭此髮間安得不三致意哉

何瓊

佩之偃蹇兮。衆蓼然而蔽之。惟此黨人之不諒

兮。恐嫉妒而折之。

蓼音優折去聲。偃蹇傑出貌。蓼然盛障貌。折讀若致北

音也。折之，摧折之也。小人交相爲蔽，亦可已矣。而必將摧折而後已者，蓋黨人恐其復用，乘機摧折，一以遂嫉妒之願也。勞時續紛其變易兮，又何

可以淹留。時序既更，則物性亦變而不芳。奪故不可以淹留也。蘭芷變而不芳

兮，荃蕙化而爲茅。何昔日之芳草兮，今直爲此

蕭艾也。茅，古音矛。先言時之變易，而後言芳

故人材不能自立，而隨風而靡，亦可見矣。豈其有他故兮，莫好脩之

害也。莫疑辭，莊子莫則傳言者，殃蓋疑。余以蘭

爲可恃兮，羌無實而容長。長如莊子有長若，不

中無實得而貌若有長也。委厥美以從俗兮，苟得列乎衆芳

觀其今日之變則知其當日不過椒專佞以慢附虛名而至而非守死善道者矣。椒專佞以慢

惜兮。椒又充其佩幃。既干進而務入兮。又何芳

之能祗。椒音殺。椒茱萸也。爾雅椒檓醜菜干。進務入指椒檓言不能自祗其芳且將

不成其爲椒檓矣固時俗之流從兮。又孰能無變化。

歸

時俗流從而不能不變以見特立之難而非覽盡其材之罪也。此下疑脫及余餘二句。

椒蘭其若茲兮。又况揭車與江離。

昔之美衆芳如彼而今之

責衆芳如此者以瓊佩受蔽而衆芳默不爲救也。

惟茲佩之可貴兮。委

厥美而歷茲。

歷茲歷此摧折而不變也

芳菲菲而難虧兮。芬

至今猶未沫。和調度以自娛兮。聊浮游而求女。

沫音昧調去聲。難虧人不能損其美也。未沫已未嘗貶其節也。和調度以自娛。所謂古之得道者窮亦樂通亦樂也。浮游猶逍遙也。蓋及余衆芳既不可恃則求女亦非可以驟致也。及余

飾之方壯兮。周流觀乎上下。余飾方壯喻學力方富足以有爲也。

周流觀乎上下。審察其求合之人也。此靈氛二句疑應在孰能無變化下。攬椒蘭句上。

既告余以吉占兮。歷吉日乎吾將行也。歷擇折瓊

枝以爲羞兮。精瓊靡以爲粦。應音靡。粦音張。羞乾脯精治之精。

也。靡屑也。爲余駕飛龍兮。雜瑤象以爲車。上爲

象飾車取其貴重華美。何離心之可同兮。吾

將遠逝以自疏。離心既不可同則雖欲強合而不能惟有遠逝自疏庶免于數。

而致。遭吾道夫崑崙兮。路脩遠以周流。遭音戰。吳楚

諺謂繞道為遶。揚雲霓之晻藹兮。鳴玉鸞之啾啾。晻藹音掩。

晻藹。晻藹隱翳貌。鸞鈴之聲也。朝發軔于天津兮。夕余至乎

西極。天津。天漢之津。西極。極西之地。夕至西極。預期之辭也。鳳凰翼其承

旂兮。高翱翔之翼翼。鳳凰靈鳥。知我西行。恐有艱阻。故承旂以備使也。

忽吾行此流沙兮。遵赤水而容與。流沙。即禹貢流沙之地也。

赤水。近崑崙。流沙難行。故遵赤水而徘徊也。麾蛟龍以梁津兮。詔西

皇使涉予。蛟龍為梁。則流沙易過。西皇涉予。則不憂別有艱阻。西皇少皞金天氏也。

路脩遠以多艱兮。騰衆車使徑待。待音提。騰飛騰速駕也。

路不周以左轉兮。指西海以爲期。不周山名在西北自東往

西本須右行遇不周當路故左轉而指西海爲期也屯余車其千乘兮。齊

玉軼而並馳。軼音第。軼車中橫板所以駕人倚者字從車從人倚一之象駕八

龍之婉婉兮。載雲旗之委蛇。婉婉屈曲貌。委蛇蕩漾貌抑志

而弭節兮。神高馳之邈邈。抑志抑下其行道之初志也。弭節止其旌

節也。邈邈神遠屬也。陸機文賦或含毫而邈然奏九歌而舞韶兮。聊假

日以媮樂。樂音勞。九歌成功韶樂盡善本以致治也。今既無所可用故藉以遣懷

費日陟陞皇之赫戲兮。忽臨睨夫舊鄉。戲音熹。西皇

之地最高故曰陞皇赫戲與赫曦同過于熱也素問火太過曰赫曦登涉既高無所不見故忽

臨睨于僕夫悲余馬懷兮。蜷局顧而不行。蜷音拳。

僕夫猶復戀舊疲馬猶懷故鄉而蜷局不行。況我有情豈能遽去宗邦哉。亂曰。取所未盡

之意不擇次序而已矣哉。國無人兮莫我知兮。并言之故謂之亂。

又何懷乎故都。國有人則不至于賢而被放矣。既莫足與爲美

政兮。吾將從彭咸之所居。不足與爲美政而後從彭咸之所居則亦

有以見其憂世憂民之心切而非徒以死懟君者矣。

屈騷指掌

卷二

武進胡文英繩崖注

九歌

九歌共十一篇，湘君、湘夫人、合廟分獻，各歌其辭。大司命、少司命亦然。祭

之所有九，故謂之九歌。內惟東皇太一篇，正說祭祀，畧有寓意。餘六篇，則借祭神而寫其離合之思，期望之意。

東皇太一

史記：天官書，中宮天極星，其一明者，太一常居也。又封禪書：天

神貴者，太一、太一、佐曰五帝，古者天子以春秋祭太一東南郊，謂之東皇者，帝出乎震，震東方也。此本非庶民所祭，而土俗好祀之，猶今吳楚民間爲玉皇醮之類。屈子爲之作歌，亦不逆俗而獵較之意也。

吉日兮辰良。穆將愉兮上皇。

穆和敬之意。上皇即東皇也。穆然而

將愉悅之。不敢自撫長劍兮玉珥。璆鏘鳴兮琳

琅。璆劍鐔兩旁飾也。璆玉瑤席兮玉瑱。瑱鎮同

佩也。琳琅鏘鳴之聲也。瑤席兮玉瑱。瑱鎮同

圭東皇太一禮絕衆神故用玉瑱也。盍將把兮

瓊芳。盍發語辭與蓋闔俱通。孟子蓋亦反其本

以冒蕙肴而飾以爲蕙肴蒸兮蘭藉。奠桂酒兮

椒漿。藉如藉用白茅之藉。漿飯汁也。吳楚風俗祭祀皆用之。揚枹兮拊鼓。

枹音桴。枹擊鼓槌也。疏緩節兮安歌。疏分明也。節今

謂之陳筴瑟兮浩倡。浩繁也。倡者既多和者不

拍板。陳筴瑟兮浩倡。少故後云五音紛兮繁會

也

靈偃蹇兮姣服。芳菲菲兮滿堂。姣服美服。神靈之服。蓋

設像象神而祭也。芳菲滿五音紛紛繁會。君欣

欣兮樂康。五音繁會。曲終以亂。將送神也。神樂康則祭者之誠盡而受福矣。

雲中君

雲神也

浴蘭湯兮沐芳

浴蘭沐芳為神像潔也至今吳楚迎神賽報猶然或謂古無塑

像然觀戰國策木偶人士偶人之語則像之設也蓋已久矣

華采衣兮若英

華讀如華麗之華若英如花之生動也

靈連蜷兮既留

連蜷盤旋貌

昭昭兮未央

昭昭微明迎神至早華采雖燦爛于昭昭之際然夜猶未央也

將憺兮壽宮

審發語辭憺恬也壽宮上壽之宮言神將安恬于上壽之宮也與

日月兮齊光

雲以日月出而明故云齊光

龍駕兮帝服

龍駕雕螭

龍為座也帝服如帝之藻火山龍也迎神則不嫌用尊服

聊翱翔兮周章

周章

急欲去而不能久留之貌故下遂云既降而焱遠舉也

靈皇皇兮既降焱

遠舉兮雲中。

焱音飆。皇皇盛也。既降蛻龍駕而入內也。靈既降位而見其焱然。

遠舉至于雲中也。

覽冀州兮有餘。橫四海兮焉窮。焉音烟。

五子之歌惟彼陶唐有此冀方。冀爲九州之總名有自來矣。二句言其德之所被者廣也。思

夫君兮太息。極勞心兮憊憊。

夫音扶。憊音冲。太息神去之速而

不可留也。勞心憊憊祭者念神之德而不忘也。

湘君 湘山之神也

君不行兮夷猶。君謂神夷猶容與也蹇誰留兮中洲。蹇行不前

也。美要眇兮宜脩。要眇窈窕情盼之貌脩靈脩謂神也山鬼篇留靈脩兮憺

忘歸亦謂神也承上句而言君之不行者得毋復有所美要眇之人與靈脩相宜故留而不來

乎蓋因其遲來而生疑也沛吾乘兮桂舟。乃未幾而見神沛然乘吾之桂舟矣

令沅湘兮無波。沅江湘江俱入洞庭湖皆湘君所治也使江水兮

安流。途既坦庶幾神可以速至望夫君兮未來。吹參差兮誰

思。夫音扶。參差洞簫也大者二十三管小者十六管其法至沈約時已絕唐人倚窗間品

玉參差蘇子瞻客有吹洞簫皆借用也言望君而君不來則我之吹參差而俟者實誰為乎神

不可以駕飛龍兮北征。適吾道兮洞庭。適音戰

望神之來而見神反駕飛龍而北征何哉。蓋以洞庭之道多阻神已適繞遠吾道而不能遽至

矣。薜荔拍兮蕙綢。拍舒張貌以薜荔為桂舟蓀之蓋而以蕙綢繆約之

橈兮蘭旌。蓀即蘭花所結之蘭蓀也橈今惟川船下洞庭用之柄小末大似蘭蓀也

旌旌旗桂望沅陽兮極浦。沅陽王逸云江碕名舟之飾也極浦近浦也將近浦

而後橫大江謂橫大江兮揚靈。橫大江而揚靈則神將鑒我之

精誠而揚靈兮未極。女嬋媛兮為余太息。揚靈來矣

暗喻君忱猶未全屬也。女湘橫流涕兮潺湲。隱君之侍女借喻君側之賢人。

思君兮惝側。惝音斐。旁觀者猶為我太息當局者安能不自傷哉。隱痛也。惝或

作裴帷帟也有涕而不敢啼向人桂耀兮蘭世前忠臣之念君私痛自憐而已

斲冰兮積雪采薜荔兮水中寒芙蓉兮木末

音世

洩。斲冰積雪形容桂耀蘭世激水之易宜其來也今乃如采荔水中寒蓉木末而不可得者

何心不同兮媒勞恩不甚兮輕絕石瀨兮淺淺

淺淺分明易見也承上心不同飛龍兮翩翩

翩翩

恩不甚二句起下交不忠句去而不顧也起下期不信句交不忠兮怨長期不信兮告余

以不聞期不信而告以不聞即黃鼃騁驚兮江

臯夕弭節兮北渚鼃朝同早也神固時時在望而無如不我即何北渚承前

北征而言江臯不平之地北渚幽暗之鄉喻君之行止皆失其宜鳥次兮屋上

水周兮堂下。

鳥次屋上則神不來可知。水周堂下則我難去可見。

捐余玦

兮江中。遺余佩兮澧浦。采芳洲兮杜若。將以遺

兮下女。

捐余玦遺余佩皆設想期望之辭。言苟能如此則我將采芳洲之杜若以遺下

女而道我之忱矣。下女亦指神之侍女而實以指神猶稱陛下閣下之意也。杜若其根名當歸

古詩客行雖云樂不如早旋歸。古人多以客行喻失性還歸為返本則遺之當歸亦望君改過

之意。時不可兮再得。聊逍遙兮容與。

時過機失耳。豈有及哉。

則亦惟有逍遙容與而已。

湘夫人

中山經洞庭之山帝之二女居之。郭景純云天帝之二女處江為神

離騷九歌所謂湘夫人為帝子者是也。又檀弓舜葬于蒼梧之野蓋二妃未之

從也史記或對始皇云湘妃者堯之二女舜妃也始皇怒而伐其樹赭其山史公著之以見始皇之不考實而妄肆暴厲非以其事爲實也劉向不識史公微意附會于列女傳王逸以湘君爲水神湘夫人爲二妃韓昌黎以湘君爲娥皇湘夫人爲女英皆誤也以余觀之有山卽有神有神卽不能無配而分而爲二者土俗于二處致祭也玩湘君歌中橫大江兮揚靈湘夫人歌中靈之來兮如雲卽此二句亦可以想味二神之分位矣

帝子降兮北渚

自北渚而來則不蔽于幽暗矣

目眇眇兮愁予

眇眇遠而未見故使予愁也

嫋嫋兮秋風洞庭波兮木葉下

言時已甚暮可以來矣而未來故愁也

登白蘋兮騁望

蘋音煩。蘋草有青

白二種青蘋草似香附生楚北平地白蘋草似
蘼草生楚南湖濱騁望左右而望也因神未至
故迎而左與佳期兮夕張鳥何萃兮蘋中晉何
右望之

爲兮木上

張如前漢書王尊傳供張如法而辨之張謂陳設其帷帟諸物也佳期夕

張則宜來矣今乃不來是鳥可萃蘋晉可施木甚足怪也沉有芷兮澧有蘭

思公子兮未敢言

澧音里。沅既有芷澧既有蘭則我之思公子亦其宜也

未敢言未知公子之意何如也古人稱女子亦爲公子左傳莊三十二年女公子觀之荒

忽兮遠望觀流水兮潺湲

荒恍同。荒忽遠望但見流水潺湲而公

子不來其係我思爲何如哉麋何爲兮庭中蛟何爲兮水裔

二句皆借喻之辭麋至于庭中則以神不來而虛無人焉故也蛟滯于水裔則以神不惠而莫

能興雲雨也。昔伍員歎麋鹿游姑蘇之臺，楚何爲而蹈其覆轍？蛟龍失水，則蟻能苦之，何爲而罹此不祥？感慨無端，非一言可盡。亦觸緒以增悲而已。朝馳余馬兮江臯。

夕濟兮西澨。

神既而來，則我當往而迎之矣。

聞佳人兮召予，將

騰駕兮偕逝。

迎神而返，言偕逝深其情，以致欲反之意也。

築室兮水

中。

神既不肯來此，則我將築室水中，以就神之

所安。未始不可以經營而成也。夫懷襄之世，國勢已屬難救，然使屈子而得任其事，則因一時之賢才而建不拔之業，如下文所布置，固歷

歷如運諸掌也。奈何徒托諸空言而不得見諸實事哉？

葺之兮荷蓋。

葺蓋謂立

廠以蔽風雨，而後經營全局。

蓀壁兮紫壇。

壇音善。紫，紫草。可爲絳燭。以下合

百草之句。觀之，則非紫貝可知。蓋此段除玉鎮之外，皆草木芳馨之物。壇如涉江篇燕雀烏鵲

巢堂壇

刺芳椒兮成堂。

刺音播。分布也。

桂棟兮蘭橈。

舊注以木

辛夷楣兮葑房。

辛夷木筆花也似玉蘭而紫葑草名未詳

其形或云卽

罔薜荔兮爲帷。擗蕙櫨兮旣張。

音擗

芍藥故云展

僻櫨音綿。櫨聯簷

白玉兮爲鎮。

前後所用皆芳草而獨以

白玉爲鎮者蓋以理美自喻而屈子之不

動聲色坐鎮雅俗而治之概亦可見矣。疏石

蘭兮爲芳。

疏散陳也石蘭樹高二三丈葉似槐七八月開小白花甚香郢中東山產

又有草石蘭

芷葺兮荷屋。

以荷爲屋而用芷纏綿葺補之則可無風

雨飄搖

繚之兮杜衡。

繚繞也。合百草兮實庭。

合百草以

實庭則賢才衆多而

建芳馨兮廡門。

廡廡屋門外門此亦

任君所用無不備矣

似可任意而必用芳馨之物一以見
隨地之不苟一以見賢才之衆多也
九疑續兮
並迎靈之來兮如雲余既有此衆芳規模成就
迎而佳人之來捐余袂兮江中遺余襟兮澧浦
且如雲之盛乎
搴汀洲兮杜若將以遺兮遠者裸音牒。遠者以佳人終于未
至故借以隱合君身然終莫有所
遺則亦四愁詩路遠莫致之意也
時不可兮驟
得聊逍遙兮容與湘君歌不可再得是絕望之意此云不可驟得是徐俟之意

大司命

晉書天文志三台六星兩兩而居西近文昌二星日上台為司命主

壽此大司命也歌中壽夭在予即此意也史記斗魁戴匡六星曰文昌宮

廣開兮天門

大司命天之貴神主人間之壽夭故大闢天門以俟其出也

吾乘兮玄雲

紛紛然駕吾乘若玄雲之多以迎神令飄風兮先驅

使凍雨兮灑塵

爾雅暴雨謂之凍飄風先驅所以導以蕩滌邪穢暴雨灑塵所以導

迎清氣

君迴翔兮以下踰空桑兮從女

女音汝君若能迴

翔而下則我將不憚辛苦而踰空桑以從汝矣爾雅北戴斗極為空桐空桑疑即空桐也人命

係於北斗故

紛總總兮九州何壽夭兮在予

言九

州之人雖衆何人之壽夭不在司命高飛兮安暗喻已若得君則可為蒼生立命也

翔。乘清氣兮御陰陽。

高飛則無卑近之爲。安翔則無勞苦之迹。乘清氣則

所行無濁亂之事。調陰陽則萬物無天札之虞。

吾與君兮齊速導帝之

兮九坑。

坑音康。與君齊速。暗喻君臣交勉。恐美人之遲暮。故願導夫先路。帝以主宰

言亦謂神也。九坑九州之坑坎也。是時民皆陷弱。列國之君不知民間疾苦。故欲與觀而拯之

也。靈衣兮被被。玉佩兮陸離。

被平聲。言方行時。見神之佩服安

翔如壹陰兮壹陽。衆莫知兮余所爲。

壹陰壹陽言或有默

而運之者。或有顯而布之者。衆人豈能知其功用之所存哉。

折疏麻兮瑤華。

將以遺兮離居。

疏音蘇。疏麻莖葉俱似紫蘇。而青花青白色。蜀中遍產之。離

居離羣索居也。蓋上文本皆意想之境。未嘗實得如是。故于此欲折瑤華以結離居之心。如下

文所云不寢近忍愈自疏也老冉冉兮既極不寢近兮愈疏

極至也老既至而不自親于君諺所謂日遠乘

龍兮麟麟高駝兮冲天乘龍驂駕也麟麟如車

翔以下而言神竟不相顧而去矣神本未嘗下

而今忽見其去猶君未嘗近而忽若可近君本

自昔而然而忽若自今而奪其結桂枝兮延竚

愛者忠臣愛君之忱所必至也延竚望君已去而能來也追久

羌愈思兮愁人延竚望君已去而能來也追久

愁人兮奈何願若今兮無虧願若今無虧臣請

可以亡羊固人命兮有當孰離合兮可為極吾

而不得為蒼生請命則必下民有應受此陷溺

之苦而非人可謀其離合者矣孟子夫天未欲

平治天下也。行止非人之所能爲。語雖不同。而意實相類。夫聖賢忠義之士。豈僅爲身謀其顯晦哉。

少司命

孔穎達曰。武陵太守星傳云。三台

掌兵。故歌曰。登九天兮撫彗星。蓋大司命主生。少司命主死。合廟分祭也。

蘼蘭兮麋蕪。羅生兮堂下。

按麋蕪有二種。古詩

生也。爾雅。麋從水生。此水邊所生也。水邊麋蕪與蘭相似。一名香附。又中山經。子虛賦。麋蕪芎藭並列。明屬兩物。而邢昺以麋蕪爲芎藭葉。其說誤矣。此言秋蘭亦如麋蕪之多。繞堂堦而生。則爲芳易矣。喻國家教化盛行。則薰陶漸染成。就人材亦易。蓋懷王承威王之烈。始固全盛也。綠葉兮素枝。芳菲菲兮襲予。

綠葉素枝。指秋蘭言。芳菲菲襲。喻我所

得力如夫人兮自有美子。蓀何以兮愁苦。扶。夫音

夫人與祭之人也。此原暗以自喻言善。後事宜皆所素裕。君何用為我憂乎。薤蘭兮

青青。青音精。前言其多此言其盛也。綠葉兮紫莖。滿堂兮美

人。以迎神美人。喻眾賢士。忽獨與余兮目成。與余目成言神之眷我獨

繫喻君昔日之會。信已而甚任之也。入不言兮出不辭。乘回風兮

載雲旗。入不言出不辭言神之忽欲去喻君之受譏而疏已也。回風旋風也。雲旗以雲

為旗也。此言神將發駕故。悲莫悲兮生別離。神下以悲樂二語挽其心也。

道隔別離則有之矣。何以日生。蓋其言屬司樂。命而神注靈脩。念念不忘。不覺自然流露也。樂

莫樂兮新相知。神至未久故曰新相知。喻君之任已猶未久也。荷衣兮

蕙帶儵而來兮忽而逝

荷衣蕙帶言其芳潔儵來忽逝言其會少離多

二句亦指神言

夕宿兮帝郊。君誰須兮雲之際。

帝郊大司命所

治之外誰須雲際言可以降而不必有所待也

與女遊兮九河。衝飈起

兮水揚波。

女同汝。洪興祖云古本無二句古本豈能先于王逸及文選哉疑而存

之則可坊本直刪之鄰于妄作矣

與女沐兮咸池。晞女髮兮陽

之阿。

沐咸池濯之潔晞陽阿曝之乾進于此境甚易處而綦可樂也奈何嫩人不來而徒

使我臨風浩歌哉此亦謂神而喻于君也

望媼人兮未來。臨風悅兮

浩歌。孔蓋兮翠旂。登九天兮撫彗星。

媼同美旂同旌。集

孔雀尾爲蓋析翠羽爲旂言其文物儀容之盛也左傳天之有彗以除穢也言神之力可以撫

持彗柄而掃除穢惡也。愆長劍兮擁幼艾。蓀獨宜兮爲民正。幼艾猶云老少言既能撫彗而掃除穢惡又能竦長劍而擁護衆人美哉蓀之所以獨宜爲民正也。民正猶言人主蓋君正則民莫不正故謂君爲民正此亦謂神而喻于君也。

東君

日神也。漢志亦有東君。

噉將出兮東方。

噉音吞。噉日漸出貌。

照吾檻兮扶桑。

及

在扶桑之上而

已照吾檻矣。撫余馬兮安驅。夜皎皎兮既明。

明叶忙。此余字代神言也。下文操余弧。撰余轡。皆是撫馬安驅而夜既明見神之功用不疾

而駕龍輶兮乘雷。載雲旗兮委蛇。

蛇音移。乘雷車乘之聲

如雷動也。委蛇卷舒自如也。

長太息兮將上。心低徊兮顧懷。

懷叶回。太息將上言神若有所感而不暇留。低徊顧懷言神若有所戀而不能去。所以見靈

來蔽日之

有由也。羌聲色兮娛人。觀者憺兮忘歸。

言豈聲色

之足娛而神能一顧乎。然觀者則固已憺而忘歸矣。聲色指下歌舞憺字從心從詹。心有所注

也謝靈運清暉能娛人。絙瑟兮交鼓。絙音更。舊說急張。

遊子憺忘歸。句本此。擊鼓也。對簫鐘兮瑤簋。簫鐘瑤簋即招魂鏗鐘搖

也。鳴鼗兮吹竽。思靈保兮賢嫵。鼗音池與篴同。思靈保思念

欲得神靈保護。翺飛兮翠曾。展詩兮會舞。應律

賢哲嫵修也。兮合節。靈之來兮蔽日。翺然飛若翠羽之會

矣。迫諸樂器既應律而舞。又合節。神果悅而下

其靈之盛蔽日而來焉。周禮天神可得而降。蓋

歌舞之通于鬼。青雲衣兮白霓裳。神所舉長矢

神非空言也。兮射天狼。矢與天狼皆星名。射

操余弧兮反淪

降。余代神而言。弧星名。反淪降即揮

戈返景之意。反淪降所以免遲暮。援北斗兮

酌桂漿。

此卽詩維北有斗不可以挹酒。撰余轡漿而反用之。酌酒漿所以駐老。

兮高駝翔。杳冥冥兮以東行。

日旣下西北之後天色杳冥日復東

行天明則復出于東南也

河伯

河伯黃河之神也楚自威王滅越之後掠地至魯皆屬楚境故濱河土俗

祀之屈子過之因為作樂章以寓意王逸謂作于湘沅之間者謬也林西仲謂不設祭故第曰與遊夫苟不設祭歌此何為也

與女遊兮九河

即禹疏九河之河

衝風起兮橫波

衝風衝激

之風宋玉風賦衝孔動捷橫波風起則波自前橫也

乘水車兮荷蓋駕兩

龍兮驂螭

水車激水之車荷蓋以荷為蓋也駕兩龍兩服也龍無角曰螭此皆就河

伯所長而已顯與之喻願就君之所樂以為治也

登崑崙兮四望心飛

揚兮浩蕩

崑崙河之發源望久而神猶未至故登以望之然其境寥廓徒使我心飛

揚而浩蕩已耳

日將暮兮悵忘歸惟極浦兮寤懷

日暮忘歸

極浦懷思所以明已之忱而望神之必至喻年既老而不知止者以極目傷懷思君難置耳

魚鱗屋兮龍堂紫貝闕兮朱宮靈何爲兮水中

言廟中之所飾乃畫鱗爲屋畫龍爲堂以紫貝

爲闕而朱丹其宮極像神靈之所居而可安也

何爲久于水乘白鼉兮逐文魚與汝游兮河之

中而不至于乎

渚追其所好曰逐喻君若不能奮發于擾攘之

際則亦可以安行而小觀厥成也此與駕龍

騶螭皆誘

之之辭

流澌紛兮將來下子交手兮東行

紛披則道通矣故可以交手東行觀于大海

以喻陰黨既消自可以致君至治也將請也

美人兮南浦波滔滔兮來迎魚鱗鱗兮媵予

美人

指神迎猶接也媵送也予祭者自謂送祭者正

所以送神也喻自此以後則無所不順也莊子

送君者皆自崖而返卽送美人于南浦之意從此以往君既得其道旁人不能致力而君亦自凡庸矣

山鬼

天曰神地曰示人曰鬼蓋有德位之人死而主此山之祀者故一則稱之

曰若有人再則曰子三則曰靈脩四則曰公子王叔師牽入懷王公子椒固屬鑿說或以山鬼為山魃則又不然夫屈子挾九死不悔之操因挫折而乞哀于魃魃魃豈復成其為屈子哉

若有人兮山之阿被薜荔兮帶女蘿

被音披下同。女蘿

即兔絲也爾雅唐蒙女蘿女蘿兔絲蓋蒙蔓于中唐則名唐蒙布織于松栢如蘿則名女蘿在草而紐結成團如兔則名兔絲本草及郭景純俱各有所偏也兔絲隨地有之亦緣于松栢但不能如寄生之高即回頭垂絲紛紛下布故多聯草間之兔絲而尋其根則一在草一在木也

既含睇兮又宜笑子慕子兮善窈窕

被薜荔而帶女蘿言

其芳潔也。含睇宜笑。窈窕之容也。子謂神言得毋慕我而故爲此。窈窕之容乎。喻君甚任之日也。乘赤豹兮從文狸。辛夷車兮結桂旗。被石蘭

兮帶杜蘅。折芳馨兮遺所思。

言神威儀之盛。被服之芳。未嘗獨樂

而折芳馨以遺所思矣。而曷爲獨遺已乎。喻君之意有他屬也。

余處幽篁兮終

不見天。

幽篁深林密箐之中。以喻爲小人所蔽隔也。

路險難兮獨後

來。

山路崎嶇。以喻黨人幽昧險隘。使已不得前也。

表獨立兮山之上。雲

容容兮而在下。杳冥冥兮羌晝晦。東風飄兮神

靈雨。留靈脩兮憺忘歸。歲既晏兮孰華予。

言懲此路

險難而獨立高山如表。使雲皆在下。不得障我。度可與神相親也。孰知忽焉晝晦而風雨交加。

不得親矣。然我終留靈脩而忘歸。誠以歲既晏矣。非神憐我而誰肯遺芳馨以華我乎。獨立二句。喻已之願親于君。晝晦二句。喻君之自蔽其聰明。留靈脩二句。喻歸誠君父。所以動君之愛采三秀兮于山間。石磊磊兮葛蔓蔓。言我欲采

以自華。然石磊磊而不可行。葛蔓蔓而不得入。君既不肯華我。我又不得自華。所以起下怨公

子怨公子兮悵忘歸。怨公子則可以歸矣。而反

恃君愛之意。君思我兮不得閒。我既如此。君必思我

神迴護之語。山中人兮芳杜若。飲石泉兮蔭松柏。君

思我兮然疑作。言我居山中。芳潔如此。君又思

疑我矣。喻已之芳潔而君疏之也。芳。雷填填兮雨冥冥。猿啾啾兮

狄夜鳴風颯颯兮木蕭蕭思公子兮徒離憂。音狄
又蕭音修。言我之不得親君者以雷雨爰狄
風木之聲蔽君之聰使我不得上聞于君則我
雖有思君之忱而無益徒自增離別之
愁而已自章首至此皆借神以喻君也

國殤

祭戰死者之歌此宜作于郢都

操吳戈兮被犀甲

吳戈吳地所造之戈輕且利也考工記犀甲七屬壽百年

車錯轂兮短兵接

已交錯其轂不能退不能遂之時而猶以短兵相接寧死

不肯奔也旌蔽日兮敵若雲矢交墜兮士爭先凌余

陣兮躡余行左驂殪兮右刃傷彊兩輪兮繫四

馬援玉枹兮擊鳴鼓

彊音埋。旌蔽日楚兵也若雲敵也矢交墜敵也士

爭先楚兵也凌余陣躡余行敵也左驂殪右刃傷楚兵也彊兩輪繫四馬敵來彊楚輪繫楚馬

也援枹擊鼓楚兵不畏敵而仍進也天時懟兮威靈怒嚴殺盡兮

棄原塹

塹古野字。楚士之勇如此宜無不勝矣而無如天時不得若于楚有所懟而

威靈震怒者故亟盡殺而棄諸原野也嚴亟也出不入兮往不反平原

忽兮路超遠此痛其死也言見其出往而不見其入反平原忽然而死路復超遠

魂魄不知所歸故宜招魂而祭也帶長劍兮挾秦弓首雖離兮

心不懲首雖離而心不懲謂既死而猶植立壯往之至也誠既勇兮又

以武終剛強兮不可凌此言其所身既死兮神

以靈魂魄毅兮爲鬼雄此祭而祝其不泯也有願其氣作山河壯本朝

之意

禮魂

卽今之鄉賢名宦之類此作于郢都者

成禮兮會鼓

成禮備禮也禮儀旣備而後鼓以會與祭之人也

傳芭兮

代舞

芭與葩同此卽春蘭秋菊之芳也代舞代國之舞大招代秦鄭衛鳴竽張只已傳葩

薦芳卽興

嫋女倡兮容與

嫋美好也倡如禮記一倡而三嘆之倡

春蘭兮秋鞠長無絕兮終古

鞠與菊同。美其有明德以享芳馨

而祭祀不輟也

屈騷指掌 卷二

武進胡文英繩崖注

天問

此篇皆鬱極無聊搔首問天之語王逸謂天尊不可問非也戰國時百家

雜說繁稱已盛屈子借以抒憤不必古來盡有是事也沈亞之謂楚先公祠廟中所畫屈子既已斥遠安得復至先王廟中且各國之事與無關治亂于楚不相涉者亦在不已煩乎讀者正宜領其維皇降衷衆庶馮生與一切治亂興亡之述斯有益于身心若徒欣奇羨異則齊諧足矣何必于斯至柳州天對未免爲蛇添足

曰遂古之初誰傳道之

遂古太古也其時無人即有人亦無可詆究誰

傳之上下未形。何由考之。未形天地雖有而未判之時也。考察據也。

冥昭瞢闇。誰能極之。由冥而漸昭似瞢而忽闇。天將明而復晦。開闢時象。

然也。極如極之于其所往之極。馮翼惟像。何以言。雖有追溯。豈能極于此時乎。馮翼惟像。何以

識之。馮音平。馮翼天明明闇闇。惟時何爲。明明地翕闢鼓動之貌。

闇闇明而又闇。闇而又陰陽三合。何本何化。三合

明也。其時果何所爲乎。陰陽三合。何本何化。三合

即穀梁傳所云。獨陰不生。獨陽不生。獨天不生。三合然後生也。本體之始化。用之終。圓則

九重。孰營度之。必其圓且九重。其營度者則不能。圓同圓。苟無營度者。則不能。

惟茲何功。孰初作之。功如功用之功。此亦。指上九重而言也。幹維

焉繫。天極焉加。幹音握。焉音烟。下同。幹維。八

柱何當。東南何虧。何當撐柱在于何處也。何虧欠缺在于何所也。九天

之際。安放安屬。放至止也。屬統屬也。隅隈多有。誰知其數。

淮南子。天有九野。九千九百九十隅。多有幾多也。天何所沓。十二焉分。

沓重也。天于何處則重沓也。十二焉分。十二國之分。又于何處別之也。日月安屬。

列星安陳。陳古陳字。屬繫也。出自湯谷。次于蒙

汜。湯音暘。汜叶音芭。蒙汜即昧谷。自明及晦。所行幾里。夜光

何德。夜光月也。德功用也。死則又育。死謂黑而不見。如死也。育生也。厥利

維何。而顧菟在腹。菟兔同。凡物必有利而後愛之。如腹心。今菟之于月何

所利而然乎。女岐無合。夫焉取九子。夫音扶。子音宰。戰國策。齊有

處女守節不嫁而使有九子女岐縫裳通于澆而生子而猶曰不嫁何異世之竊祿而偽云少無宦情伯強何處惠氣安在後漢書強梁祖門者乎強梁所以消不祥也指而問之者以楚之類敗如是莫有救者則伯強之驅厲與惠氣之順物皆虛何闔而晦何開而明子太玄月缺其搏不語耳如開明角宿未旦曜靈安藏于東方曜靈日也不任汨鴻師何以尚之周書鯀陞洪水汨陳其五行帝乃震怒不畀洪範九疇鴻與洪同荀子禹有功抑下鴻問鯀果不勝治水之任而汨陳其五行衆何以舉之耶僉曰何憂何不課而行之課使人視其所爲果可以成功方任以九年之久也晉書鴟龜曳銜鯁何聽焉鯁同鯀言有若鴟莫之課而自厲

之龜曳銜以導鯀此乃魍魎之技所以眩鯀耳
鯀何以直而遽信聽之乎南山經龜而鳥首虺
尾疑卽此也今壺關縣有鯀錯鑿溝屈子必虺
有墮譏人術中若鯀之信鴟龜故憤而問之順
欲成功帝何刑焉順鯀之欲倘能成功則已帝何以遽加刑乎永邊
在羽山夫何三年不施施弛同伯禹腹鯀夫何
以變化夫音扶。變化謂不同纂就前緒遂成
考功何續初繼業而厥謀不同洪泉極深何以
寘之地方九則何以墳之寘音珍。吳楚謂塞
本相諧鄭康成云古者聲寘與塵同也孔穎達
曰寘音田又音珍是也墳王逸注分也謂九州
之地有九品禹何應龍何畫河海何歷應龍佐禹治水
以能分別之也

者問所畫所歷。鮌何所營。禹何所成。康回憑怒。今在何處乎。

鑿何故以東南傾。

鑿地同舊注。康回共工名與顓頊爭帝。怒觸不周山。天柱

折地維缺。故東南傾也。秦詛楚文。今楚王熊相康回無道。蓋共工氏恃力不以德者。問共工亦

人耳。憑其一怒。何以能傾地乎。九州安錯。川谷何洿。

錯安放也。湊深之也。

東流不溢。孰知其故。

莊子尾閭泄之問。孰能知其故而云然乎。東西

南北。其脩孰多。南北順隳。其衍幾何。

隳音妥。順隳順其

勢而隳長也。衍斷而復續也。

崑崙縣圃。其尻安在。

尻音考。莊

子尻以爲輪。東方朔傳。尻益高。問增城九重。其

其坐落何處。可以尋其本而上耶。增城九重。其

高幾里。增城列仙所居。九重九層也。合九四方

層而計其高有幾里。而不得上乎。

之門。其誰從焉。言層城之地，四方皆有門，宜從

知所西北辟啓。何氣通焉。辟音闕。西北肅殺

從也。非君子所入，何氣可通。知而怪詢之辭。日安不到。燭龍何照。北海外

鐘山之神，是謂燭龍，視爲晝，瞑爲夜，問日之廣

大光明安有不到之處乎。燭龍究何所照乎。
羲和之未揚，若華何光。羲和，日御也。若華，若木

雖明不如日之明也。羲和未御，則日不出矣。若

華豈足爲光哉。暗喻已未能致君其餘小惠，皆

不足，以照臨下土也。何所冬煖，何所夏寒。冬寒夏暖，理也。

冬煖夏寒，寃在何處乎。焉有石林。焉音烟。石屬土，勢所不能爲也。

今乃云石林。何獸能言。獸能鳴，理也。今乃能言

能言屈子豈不知之今云此者誠以奸回焉有

鬼蜮非人可比不過獸中之能言者耳焉有

龍虬負熊以遊龍虬本貴今反負熊雄虬九首

儵忽焉在虬本陰類而雄則剛決而必能致螫

小人之忽來忽何所不死長人何守何所不死

子同歸于盡非小人獨不死也人亦何苦為小

人哉何守有何官守也人徒長大而無官守之

效何足取焉山海經不死民在交脛國東家靡

語焦僥氏三尺長者不過十謂長三丈也

萍九衢泉華安居萍音平泉音洗。泉麻也海

紫莖元華黃實名曰建木百仞無枝枝有九櫨

下有九枸其實如麻其葉如芒靡萍建木類也

九衢亦九櫨九枸之意問既已九衢則其華實

宜大矣今僅如麻泉者何哉安居即檀弓何居

之靈蛇吞象。厥大何如。海內南經巴蛇食象蛇本陰類今乃滋長而能

食象厥大究何。黑水立趾。三危安在。延年不死。

壽何所止。黑水三危人皆曰其鄉不死究在何處乎其曰延年不死壽至于幾何乎

夫不死之鄉渺茫難即。延年不死亦有時窮乃憤詰之辭。舊解作屈子欲求延年失之遠矣。立

趾以涉黑。鯪魚何所。魃堆焉處。魃音祈。舊說水故也。鯪魚何所。魃堆焉處。鯪魚即穿山甲

但無義可取。按海外西經龍魚陵居在其北。狀如狸。即有神聖。乘此以行九野。又六書故鯪當

作陵。是鯪魚即陵居之魚也。問今尚有此可乘之魚乎。東山經北號山有鳥狀如雞而白首鼠

足而虎爪。其名曰魃。雀亦食。羿焉彈日。鳥焉解

羽。彈音畢。淮南子羿射十日中其九日。日中羽鳥盡死。墮其羽翼。問羿焉能彈日。鳥焉能解

天問

羽乎彈射也禹之力獻功。降省下土方。焉得彼僩山

女而通之于台桑。僩音塗。問禹之勤力成功以省視九土宜無暇為室家

之計矣。焉得適有僩山之閔妃匹合。厥身是繼。

胡為嗜不同味而快鼃飽。鼃朝同。憂其無家而于焉匹合。將以圖

已之繼祀固也。然何為辛壬癸甲。四日遽行。啓

有如飲食不得真味。而但取快于朝飽乎。啓

代益作后。卒然離蠶。離同。離蠶同孽。禹薦益而啓為君。若代益者然。卒

然羅蠶謂方立而何啓惟憂而能拘是達。孟子謂啓

賢能敬承繼禹之道。蓋操心危。慮患深而後達者乎。此所謂惟憂而能拘是達也。皆歸

射籍而無害厥躬。何后益作革而禹播降。籍音

二音降平聲。益掌虞而作兵革禹但播降而未有射之箕裘貽啓也而啟能射而無害厥躬所以見啓之惟憂而能拘是達爲賢也籀矢疾聲吳楚皆有此該玩大戰于甘之義則有扈未嘗束手待斃而彼此交射可知矣故曰皆歸射籀籀字從竹從牽從訇聲與訇如白坑破之訇同與躬降啓棘賓商九辨九歌。棘亟也賓不以字諧聲。啓棘賓商九辨九歌。爲臣也商契之後後夔不祀故禮樂并歸于契之後所掌也契爲司徒本掌九土之辨而遂以九土之歌教民也啓方平有扈之孽而卽亟亟于禮樂故下文謂之勤也何勤子屠母而死分竟。屠勞苦也勤子啓也屠母啓之母也境地。啓之子母如是勤苦宜無太康之患矣何以啓死之後而羿遂距于河而分其境地乎豈非天降羿而爲此乎楚之先篁路籃縷創業甚難而一旦爲小人所誘身死地帝降夷羿削豈非天降螽賊如羿之禍夏乎。

革孽夏民。胡射夫河伯而妻彼雒嬪。

河雒二國名。帝降羿。

以革夏民之孽。則羿應遵道。馮珧利決。封禘是

射。何獻蒸肉之膏。而后帝不若。

馮音憑。珧音遙。射音石。馮依。

倚也。珧。玉石。所以為決也。封禘。大豕也。后帝。仲

康也。羿倚其利。決而獻封禘之肉。暗示善射。以

脅帝。故帝不順其所為也。今強秦脅制頃襄。泥

而頃襄不敢不從。則亦有愧于仲康多矣。泥

娶純狐。眩妻爰謀。

純狐氏。羿妻之黨也。泥之所娶。于純狐氏者。所以眩羿。

之妻而致其謀也。

何羿之射革而交吞揆之。

羿死而泥娶其室。則

知殺羿之謀。其妻亦與矣。揆度

阻窮西征。曦何

也。交吞揆。交謀而吞并之也。

越焉。化為黃熊。巫何活焉。

帝欲阻窮鮌。西行之路。故置之羽山。何以

能越巘而出化爲黃熊乎海內西經開明東有
巫彭巫抵巫陽巫履巫凡巫相夾窳窳之尸皆
操不死之藥以距之註爲却死氣求咸播秬黍
更生意鮓亦必有其事而詢之歟

莆藿是營何由并投而鮓疾脩盈鮓音萑。言
已播種秬

黍而營度莆藿之草地何故與工驩三苗并投
四裔而鮓之痛更脩盈乎疾痛也脩謂永遏三

年盈謂念極而化爲黃熊其痛更甚也白蜺嬰茀胡爲此堂安得

夫良藥不能固臧臧藏同。蜺天地之淫氣也
嬰茀縈繞也蓋函其形于堂

也大荒南經雲雨之山有木焉名曰欒禹攻雲
雨有赤石焉生欒黃木赤枝青葉羣帝焉取藥

白蜺固可以止雨然此堂則非其所也因問禹
既攻山而得良藥矣何以不能固臧其父而任

其踰巘化熊乎此段舊引列仙傳崔文子事頗
爲相合蔣叔塋云恐是列仙傳附會其說余以

爲不獨附會

天式從

同縱

橫陽離爰死

白虎通天弓虹也天

亦無所取義

式疑卽天弓也

耳談昔有人于山中見二虫各

吐青紅氣遂成虹蜺日沒氣消虫亦不見陽日

也虹固生于日雨相交日一離則暑濕消而大

死矣此因上文白蜺下文起雨而及之也

鳥何鳴夫焉喪厥體

焉音烟

大鳥商羊也喪

雨商羊鼓舞問商羊何以知雨而鳴乎既能前

知何至喪厥體乎張協雜詩黑蜺躍重淵商羊

舞野庭飛廉應南箕豐隆迎

號屏商羊號屏亦以類從也

萍號卽屏翳雨師也問

之撰體脅鹿何以膺之

何以興此雨乎撰具也

萍號雖具人體然其脅乃

鼇戴山抃何以安之

似鹿何以膺此重任乎

巨鼇戴山而抃舞則山宜琬駘

不安矣何以能安而不傾乎

釋舟陵行何以

遷之。

問澆舍水陸地行舟究何以遷之乎

惟澆在戶。何求于嫂。何

少康逐犬而顛隕厥首。

澆如此多力。何不可為。而乃不知男女之分。在

嫂之戶。究何求乎。澆之肆無忌憚。宜若人不能遏之矣。何為不過如獵獸然。少康逐犬。即顛隕

其首

女岐縫裳而館同爰止。

女岐澆之嫂也。因為澆縫裳而館

以止

何顛易厥首。而親以逢殆。

少康知澆宿女岐而襲之。誤斷

也。岐首而澆終不免。豈非奸回無倖免之理乎。

湯謀易旅。何以厚之。

朱

菴云。湯字康字之誤。謂少康也。愚謂此恐是錯簡。若移于何道取之之下。便于桀伐蒙山一

氣相承矣。

覆舟斟尋。何道取之。

斟尋已覆舟。少康收其餘燼。以滅澆。果何

道取之乎。

桀伐蒙山。何所得焉。

桀伐蒙山。得妹嬉而亡國。則得不償失矣。

何足以妹嬉何肆。湯何殛焉。憤鄭袖之惡而借以反之。非謂湯殛

之爲不舜閔在家。父何以鯀。堯不姚告。三女何

當也。鯀同鰥。閔憂也。瞽瞍至親而不知舜之孝。二女無親而命于堯。此何故哉。在于能察與

不能察耳。懷襄于屈子。厥萌在初。何所意焉。璜

臺十成。誰所極焉。極音忌。紂爲象箸。箕子曰。彼爲象箸。必爲玉杯。爲玉杯

必爲瑤臺瓊室。是以有其初。萌即可意想而登。知極料其所終也。老子九層之臺起于累土。

立爲帝。孰道尚之。道猶引導。尚加諸民上也。女媧有體。孰制

匠之。媧音瓜。女媧之牛首蛇身。固異。舜服厥

弟。終然爲害。于恒人矣。然孰從而制度其形乎。何肆犬豕而厥

子蘭亦猶象耳。襄王柰何不悟哉。

身不危敗。

象傲如此，宜自及于危敗矣。不危敗者，何哉？然象害兄子蘭，害父其罪尤甚。

也。吳獲迄古，南嶽是止，孰期去斯，得兩男子。

言吳

國之得以迄今猶存，古道者以泰伯仲雍之採

藥荆蠻，遂來于吳耳。然豈期遠去如斯而得此

兩男子乎？吳獲迄古，若諸樊季札，讓國顯名，亦猶行古之道也。

緣鵠飾玉，后帝

是饗。

鵠，玉鼎之飾也。后帝，湯也。此即戰國時負鼎于湯之說也。

何承謀夏桀。

終以滅喪。

言尹承湯之命，謀輔夏桀，則不宜喪矣。何以終至喪亡乎？

帝乃降

觀，下逢伊摯。

上帝降鑒，見夏不悛，而適逢伊尹之元聖，因簡在帝心，而使之佐湯。

伐桀也。

何條放致罰，而黎服大說。

說音悅。黎服大說，黎民服其

公而說也。何者，使人自醒之辭。

簡狄在臺，譽何宜。玄鳥致貽女。

何喜。

嚳何以知簡狄之宜而娶之簡狄何以知元鳥爲祥而喜之豈商之興夏之亡早已

有天數耶

該秉季德。

厥父是臧。

胡終弊于有扈。

牧夫

牛羊。

該少皞氏之季子卽蓐收爲金正者也。厥父少皞也是臧象賢也。有扈氏該之後也。

甘誓曰有扈氏威侮五行怠棄三正專以此聲之是有扈棄其祖訓宜其降爲牧圉也有扈之

祖與楚祖同司五行而有扈忽焉不祀是真可以爲鑒也。干協時舞何以懷

之平脅曼膚何以肥之。

啓固賢而能敬承繼禹之道矣然思禹當時逆

命者則舞干羽以懷之順命者厚其生以養之何至今日不能忘情有扈而以干戈滅之乎則

亦有以見有扈之自取亡滅矣禮四體旣正膚革充盈身之肥也曼膚寬膚也昌黎詩慢膚多

汗真相宜有扈牧豎云何而逢有扈不過牧豎卽用此也。有扈牧豎云何而逢有扈不過牧豎之類耳何以逢

啓之怒乎承上懷之肥之而言應是有扈既滅
啓未嘗殺之令爲牧豎以辱之也懷王入關朝
秦如藩臣禮其辱擊牀先出其命何從問啓當
亦不減于牧豎矣擊牀先出其命何從盛怒之
時親擊有扈之狀而將殺之有扈何從先出以
逃其死乎懷王之逃竄而終不能免其悲更有
甚于有恒秉季德焉得夫朴牛焉音烟。朴。鞭
扈者恒秉季德焉得夫朴牛也言有扈若能
常秉其祖德必不何往營班祿不但還來也但空
至于執朴牧牛也何往營班祿不但還來也也莊
子稱有扈氏用兵不止求實無已是有扈往求
所班之祿不肯空還故至國爲虛厲降于牧圉
也懷襄之營營所昏微遵迹有狄不寧何繁鳥
得毋亦似此乎

萃棘負子肆情

鳥鶴也棘亟也衛至于宣公惠公之時亦昏亂微弱之至矣而

懿公猶遵循其迹而行卒之有狄人來伐而不
得安寧因問懿公何以養羣鶴于孔亟之時宣

姜何以肆情于負子之日乎襄王之晏安鳩毒更甚于衛懿鄭袖之嫉妒淫慝更甚于宣姜其

柰之何哉眩弟並淫危害厥兄何變化以作詐而後

嗣逢長公子頑則眩其弟而並于淫亂之宣姜惠公則危害其兄以天理計之宜其滅

絕矣而何以頑與朔皆有後人乎子蘭之外眩其兄內比于淫亂之鄭袖上危害其父天理不

可測得毋又有如是者乎成湯東巡有莘爰極何乞彼小臣

而吉妃是得小臣伊尹也吉妃有莘氏之女也此正與棄賢臣而寵哲婦者相反

故問水濱之木得彼小子夫何惡之媵有莘之

婦此以見天道之難明也夫伊尹浮于水濱之木而不死則天若有以佑之矣又何以惡之

而使爲賤役媵湯出重泉夫何臯尤不勝心哉有莘之婦乎

帝夫誰使挑之。

太公金匱。桀怒湯。以諛臣趙梁。計召而囚之。均臺。置之重泉。湯

乃行賂。桀釋之。問湯何罪而囚之。平。湯本無意

于桀。非。小人有以挑其釁。何以至此。平。商書。肇

我邦于有夏。若苗之有莠。若粟之有秕。小大戰

戰。罔不懼于非辜。是湯之伐桀。亦以諛臣百計

謀害于湯。勢不容緩耳。懷王之絕。會鼃爭盟。何

齊而連兵不解。亦有開其釁者矣。會鼃爭盟。何

踐吾期。蒼鳥羣飛。孰使萃之。

津也。踐吾期。武王

適至。不期而會者八百也。蒼鳥羣飛。即飛鴻滿

野之說也。孰使萃之。見紂之有以感召妖孽也。

列擊紂躬。叔旦不嘉。何親揆發。定周之命。以咨

嗟。逸周書。武王擊之以輕呂。所謂列擊紂躬也。

又曰。周公再拜稽首乃出。是叔旦不嘉也。又

云。王乃升汾之阜。以望商邑。永嘆曰。嗚呼。不淑

兌天。嗟。是定周之命。以咨嗟也。夫武王伐商。亦

親揆其足以代商而後發也何已定而猶懼授
乎。武王雖勝而懼，襄王雖敗而樂，不亦異乎？授
殷天下，其位安施？反成乃亡，其罪伊何？湯受命
也，反成反于成湯之所爲也，安施伊何？爭遣伐器
詰之而使人揭其故以爲鑒也。
何以行之？並驅擊翼，何以將之？爭遣伐器，謂諸侯皆惡紂而爭
使人以攻伐之器入紂師，並驅擊翼，謂爭遣之
時，或並驅而入，或擊其左右翼也，何以行？何以
將？見紂之取衆，怒如火，人自致死，不勞武王之
力也。昭后成遊，南土爰
底，厥利惟何？逢彼白雉。逢彼白雉，未詳其事，或引竹書紀年，雉兔皆震
及越裳白雉，俱未確。今按大冶縣有白雉山，稱
有白雉之祥，則昭王受楚之愚，亦殆如蜀王之
迎糞金。
牛耳。穆王巧梅，夫何周流？環理天下，夫何索

求。梅拇同。巧梅疾足也。言其將使天妖夫曳

銜。何號於市。周幽誰誅焉得夫褒姒。妖夫曳銜謂賣壓弧

箕服之人也。何號于市謂童謠何以知有是人

有是禍也焉得何處得此傾城之婦訝之也以

喻鄭天命反側何罰何佑齊桓九合卒然身殺

桓公輔以管仲則治用三子而亂猶懷王用屈

子而治信上官大夫而不得其死也何罰何

佑疑應作彼王紂之躬孰使亂惑。日孰使其惡

何佑何罰何惡輔弼。讒諂是服。惡去聲比干何逆而抑沉之

雷開何順而賜封之。何逆何事逆意何順何事

則知紂之惑亂矣雷開紂諛臣懷襄之于何聖

屈子上官亦今日之比干雷開耳故問之

人之一德。卒其異方。梅伯受醢。箕子詳狂。詳與

一德異方。言或受醢以麋其軀。或佯狂以全其生。當有各行其所安之理也。稷維元

子。帝何竺之。投之于冰上。鳥何煥之。竺與毒通。如山海經

以天竺為天毒是也。元子長子也。毒之謂不肯收育而棄之也。既為長子。足以承宗祀。帝何以

毒而棄之也。既投之冰上。宜不能生矣。鳥何覆翼而煥之乎。君雖以為不祥而棄之。天乃憐而

收之。屈子見棄于君。能無致望于天之垂憫乎。何馮弓挾矢。殊能將之。

既驚帝切激。何逢長之。馮與憑同。將舉也。言后稷當懸弧之時。何以

即能憑弓挾矢而舉之乎。既已驚帝切激。何以逢人物之救而長之乎。詩稱其誕生之後。即能

匍匐而行。則其驚帝激切。故帝舍之而立。摯蓋有由也。屈子幼含內美。未知得長與否。故問之。

伯昌號衰。秉鞭作牧。何令徹彼岐社。命有殷國。

西伯號歎于衰世。後得賜斧鉞。爲西方諸侯之長。亦已幸矣。何以竟令徹岐社。而有殷國乎。楚既非秦之臣。若能遷藏就岐。何能依。藏。卽三藏也。不窟自

竄于戎狄。至太王自藏遷而就岐。問何能依。殷淒乎楚襄之東北。保陳城。何以不學太王乎。殷

有惑婦何所譏。以姐已比鄭袖。憤之甚而反言。以詰之也。太王爰及姜女而與

紂用婦言而滅其得。失可考。故并舉之。受賜茲醢。西伯上告。何親

就上帝罰。殷之命以不救。上告。謂文王仰天而歎也。羑里之囚。文王

蓋知天命而不辭。是親受上帝罰也。乃上帝既罰文王。則宜救殷矣。兩者不可測。究誰爲之乎。

師望在肆。昌何識。鼓刀揚聲。后何喜。識音志。文王識太

公于屠肆問何以識之而何以喜之乎

武發殺殷何所悒載尸集

戰何所急

悒於悒載尸集戰載木主而戰也夫

里之怨而舒其於悒載尸集戰而誓之曰時哉弗可失蓋甚急也而襄王乃忘殺父之讐而無所悒無所急豈人伯林雉經維其何故感天抑子而宜若是乎

墜夫誰畏懼

夫音扶。伯林申生也雉經縊于新城也感天抑地言其精誠此以

申生自喻言申生之不必懼乃無聊之極不能使已不懼而欲人不懼亦可悲矣皇天

集命惟何戒之受禮天下又使至代之

集命指開國之

君言代之指亡國之君言問何以天命之不于常如此乎

初湯臣摯後茲承

輔何卒官湯尊食宗緒

後茲承輔伊尹承成湯而輔桀也桀得賢臣而

不能用卒致喪亡。勲闔夢生。少離散亡。何壯武而自痛其不可也。

厲能流厥嚴。離音罹。嚴應作莊。班固王逸避漢明帝諱而改之也。闔廬之母得

祥夢而生闔廬。故能有勲。然其少年時不得位而散于外。何以能如是之武厲而顯其莊嚴乎。

古之少罹散亡者如是而襄王彭鏗斟雉帝何質齊而歸。莫能自振者何哉。

饗受壽永。多夫何長。人皆云彭鏗斟雉獻之上帝。帝饗而私與之壽。夫上

帝豈猶貪飲食之微乎。不然而壽何以如是之多乎。王帶存云美彭鏗之饗于帝。傷已之不

見答于君也。問壽命之多長。中央共牧。后何怒。傷已之將自沉而不得壽也。

蠡蛾微命。力何固。蠡古蜂字。蛾古蟻字。中央共牧。君也。何以天往往而怒

之乎。蠡蟻至微也。羣守而不能奪其君。其力之固。豈反勝于人乎。亦以人不能識君臣如蠡蟻

耳。驚女采薇鹿何佑。北至回水萃何喜。二句未詳其義

○薇野菜俗名金剛藤形極似蕨有粘涎者楚人名鮎魚鬚其爽者名黃鱖鬚淪之可食北方

曰龍鬚菜滇中曰草薺菜詩薇亦剛止謂其已老中作釧時言之也兄有噬犬弟

何欲易之以百兩卒無祿。舊註秦伯有噬犬弟鍼請之不與以百兩

易之又不可聽因逐鍼奔晉夫秦伯逐弟固為不祥然以襄王較之則大不及矣况子蘭陷父于

死不逐已為寬典况更任之乎薄暮雷電歸何憂厥嚴不奉帝

何求。周書天大雷電以風又云今天動威以彰周公之德惟朕小子其親迎夫周公誠意

威天因雷電而迎歸成王究何憂乎設成王遇天威而不迎周公天又將何以處之乎念周公

之威天遂得歸周傷已之伏匿穴處爰何云荆不得歸而懷襄終不悟也

勲作師夫何長。悟過改更。我又何言。楚先王筆路籃縷以

處草莽所謂伏匿穴處也。楚武王荆尸始陳其

衆所謂荆勲作師也。夫祖宗創業艱難。貽謀甚

遠。王亦知其故乎。若悟其所行。吳光爭國。久余

之過而改之。我又何必多言乎。

是勝。吳光爭國家之勝負。常勝于楚矣。何環穿

自閭社圯陵。環穿于閭社圯陵。言吳師入郢。無

也。環閭社指班處王宮諸事。穿圯陵指掘墓諸事。爰出子文。吾告堵敖

以不長。史記楚世家熊羆立。是為杜敖。杜敖五

是為成王。成王既立。舉子文為令尹。堵敖即杜

敖也。天既生令尹子文。將輔成王。以興楚。則堵

敖為君。自不能長矣。昔出賢令尹而興其少。何

主。今出不賢之令尹而亡其長君。豈非天平。何

試上自予。忠名彌彰。左傳：鬻拳強諫，弗從。臨之，以兵懼而從之。楚子卒鬻拳自殺。楚人以為忠。屈子傷楚先世君明臣直而已，不得逢其盛也。